

四庫全書

集部

欽定四庫全書

懷麓堂集卷七十九

明 李東陽 撰

文後稿十九

碑銘

明故贈光祿大夫柱國少傅兼太子太傅禮部  
尚書武英殿大學士謝公神道碑銘

弘治己未先皇帝覃恩臣下今少傅謝公於喬之祖直

菴公始贈資政大夫太子少保兵部尚書兼東閣大學士祖妣余氏贈夫人越六年乙丑今天子嗣位於喬以輔導功進今官及恭上兩宮尊號人獲以其官加贈祖為光祿大夫柱國少傅兼太子太傅禮部尚書武英殿大學士祖妣為一品夫人制得樹碑神道於喬乃自述事狀以屬東陽憶與於喬同在翰林入內閣稔聞公之志行才畧卑官小試厄於橫逆卒以終老暨其子資政公之賢然又弗顯而魁名重位正言直道偉然以學行

勲業顯於天下者乃於其孫見之向非抑遏屈鬱之久  
且深亦惡能一發至此哉是則天道慶善之公徵諸聖  
天子崇德報忠之典皆足以為世勸文而銘之宜也按  
謝氏之先本台州臨海人宋季有行長二者徙紹興餘  
姚之東山鄉公生而閎偉洞達孝友直義尤多聞識宣  
德庚戌浙江布政司辟為從事長遇事敢言布政諸公  
多折節從之進隸兵部尚書鄭公瑩素嚴重寮屬無當  
其意者凡章奏出公手則不覆視比旅試內廷混在常

等鄺道公才行力爭之乃置優格柰侍郎享掌寺事挾  
中貴勢陵蔑官屬公每正色拒之為所構陷吏部尚書  
王文端公知之奏調福建布政司都事會沙賊鄧茂七  
作亂刑部尚書薛公希璉出鎮委公軍餉先是輸費三  
倍且弗繼公收積水次召業舟者使運之量子之直約  
有損則均其償皆樂為用民不倍斂軍食亦足承檄守  
松溪政和賊保官臺山為窟合處州賊掠平陽諸縣公  
以計招其黠者用其謀誅首惡宥其脅從還所掠婦女

童穉若干人賊遂平又奏政和地廣難制請割其二里  
及福安一隅置壽寧縣薛公上其功進祿二級御史應  
顯薦公可大任吏部以資淺格不行適薛公劾巡按御  
史許仕達併及其素不謹事許京居嘗與公鄰疑事出  
於公中以危法大理卿蕭公維禎察其寃將為申辨公  
念日者言年四十六當失官歎曰命也不復自列旣免  
歸奉母嚴氏以居悉舉家政付其子徜徉山水間效仲  
長統樂志論作寫情說以自況葺譜合族而周其貧乏

延師置塾教子孫皆立身應事之方鄉人有過雖衆所  
憚者必加面斥然聞一善則獎譽不釋口尤篤舊故布  
政使黃澤在浙公嘗以諫忤後被罪力為排解既而官  
其鄉尤厚待之參政俞士悅待公國士後謫戍遼陽屢  
遣使慰訪友人俞漢遠客死為棺斂歸其喪嘗買一幼  
女既而知為宦家子女育之比長為嫁良族平生好學  
卷帙不去手為詩文下筆立就多不存稿雅不喜浮屠  
凡世俗邪妄之說一無所惑自謂以剛直得禍因號直

菴人亦以是稱之壽六十七嘗自制壽藏於雞籠山先墓成化癸巳九月二十九日卒再踰月而葬夫人余氏同鄉處士安之女溫懿端慤事舅姑孝敬備至處娣姒常倍任其勞公貧時恒以儉取足姑老不就祿留養於家躬事紡績至老不倦其治家寬而有制為教亦然羣從子姓數百指撫之甚周鄰黨之嫠婦病媪待哺者不下十數家有火警舍其家而來赴者甚衆嘗邁危疾女婦多涕泣請禱願以身代至於逮下之德尤為嫺族所



慕效云壽七十六某年月日卒越三月而合葬子一諱  
恩孫五於喬其長名遷鄉貢建試皆第一八命至今官  
次選早卒次迪舉進士累官兵部員外郎清慎有祖風  
孫五長正次丕皆有文行不失世守丕廕國子生舉順  
天鄉貢第一進士及第授翰林編修以祖命為選後其  
所為贈以此銘曰謝以國氏自周申伯歷漢中微至晉  
乃發由安暨立將相勳閥有鄉東山公蓋其裔公曰無  
徵寧遠毋偽公自作祖綽有餘地公才實多可貢可科

卑官畏途既蹶復蹉直不徇物竟嬰禍羅人不足尤天  
其謂何公家有教公子惟肖載堙弗宣天稔其報巍巍  
公門公有聞孫出應瑞世為鳳為麟上補帝袞為龍為  
山志行道施有澤在人風采凝峻蔚為名臣茲固間氣  
亦惟慶源其源維何公自作祖世苟有濟豈必在我贈  
官賜秩視祖如父計功報直亦固其所發潛闡幽於義  
斯可刻銘神道以耀終古

明故兵部尚書致仕進階光祿大夫贈太子太

保謚襄毅項公神道碑銘

公姓項氏諱忠字蓋臣其先世本汴人宋南渡有曰秀者徙浙之嘉興曾祖永原隱不仕祖邦歷孝感吳江同安三縣丞及父衡皆贈資政大夫都察院左都御史公生於吳江正統七年舉進士授兵部主事遷員外郎十四年扈從北狩陷敵中以智自拔而歸進郎中景泰某年擢廣東按察司副使嘗按部高州諜報賊携男婦數百刦村落部將請發兵公曰流賊無携家理慎無

恐及訊其俘果皆良家被掠者盡釋之四年征瀧水賊以功加從三品祿丁外艱服闋改山東按察使天順某年擢陝西按察使值歲饑亟發廩給民不待報所活萬計丁內艱軍民詣闕借留者幾千人詔起復公某年以大理寺卿召借者再至乃改都察院右副都御史巡撫其地洮岷諸番作亂公帥兵撫捕遂降其衆成化元年寇犯延綏公與寧遠伯任壽奉命禦之戰屢捷寇遽遁去西安水多鹵宋渠久廢公開一渠三十里入

鑿涇陽鄭白故渠溉田七萬頃民立生祠祀之二年敵  
人摩囀歡入寇公提督軍務與彰武伯楊信禦之寇復  
遁三年召還佐院事四年固原土胡穆蘇據石城殺  
我邊將將窺陝公總督軍務與都督劉玉討之伏羌  
伯毛忠戰死我軍遽退公即陣斬一千戶以徇衆乃  
定適彗出台斗人情恟懼公屹不為動據要害以困  
賊廷議請益兵詔以問公公謂兵不須益惟坐困可斃  
相持百餘日公單騎抵賊寨諭以福禍脇從者稍稍出

降其逸出者皆縱使去以孤其黨賊窮甚每突圍薄我  
大小三百餘戰皆却之禽其愛將楊呼哩公曰是可用  
也解所服金鈎賜而遣之約為內應卒禽穆蘇斬首  
七千六百俘獲二千六百有奇因奏便宜四事為經  
久計五年遷右都御史六年京畿大水公巡視順天  
河間永平三府多發官廩又勸分得米十六萬銀布  
牛具各萬餘所活尤衆荆襄賊李胡子者本劉千斤餘  
黨倡流民為亂公復總督軍務乃遣人持榜入山招諭

其負險不服者縱兵搜捕凡發遣還鄉者百四十萬編  
戍者萬餘斬首二千餘級獻俘於朝者百餘人仍獻便  
宜十事詔暫畱撫治進左都御史蓋自南北用兵以  
來論功遷秩者至是而再降敕獎諭者五賜白金綵  
幣者六會有星孛於天田言者謂荆襄殺戮所致公  
再疏自列言為國任怨未嘗妄殺因乞骸骨上溫詔  
慰公且召之還後荆襄三十餘年芽孽不作跡其摧創  
之力未必非綏撫地也十年拜刑部尚書尋改兵部公

曉暢戎務簡賢屬以自輔圖大展所蘊十三年錦衣衛  
百戶常瑛者挾中貴為詞察屢興大獄至擅執京朝官  
中外重足莫敢正言其非公奮筆具疏草倡諸公卿  
奏之瑛坐謫戍邊朝野稱快而其黨競仇公不置又有  
千戶吳綬先在軍中撓法為公所黜時亦用事極力構  
公欲寘之死公廷辯慷慨不少屈僅坐落職以去久之  
陷公者次第皆敗上洞察公枉復兵部尚書致仕今上  
登極及建儲恩再進階光祿大夫吏部侍郎彭公詔巡



視浙江特薦公可用而公年已至亦不果起壽八十二  
卒於正寢弘治十五年八月十一日也上遣官諭祭命  
有司治葬事贈太子太保賜諡曰襄毅錄其孫鏞為  
嘉興守禦千戶皆異數云生二子長經舉進士歷南京  
監察御史為太平知府有父風次綬累官蘇州衛指  
揮僉事守禦嘉興側室朱氏生子四緡緡繕繼公以  
十六年某日葬象賢鄉之原鮑夫人祔公剛果沈毅  
遇事敢為不惑羣議故能臨敵制勝累著勲伐及排擊

兇暴身犯大難中雖顛阻終暴白於天下而先帝知人  
燭物之明今天子報功崇德不遺舊臣之義亦可仰見  
於此矣乃叙其行業之大者而系以銘銘曰昔在英廟  
賢俊輩出甲科繼登盛者壬戌有十尚書公蓋其一掄  
才校功公在甲乙入典刑獄出長師律廟堂中嚴疆圉  
外謚識機應變捷在倉卒持堅握彊勇定羣怵公身兀  
兀其氣屹屹摧姦壘讒公有直筆公心鐵石寧折毋屈  
彼繁有徒如鬼如獮野燐宵熠潛形晝匿陰霾盪滅仰

見白日乃困而亨匪滿斯溢壯當其勞老饗其逸何以  
雪之生有階秩何以錫之沒有褒卹天王聖明君子貞  
吉視彼徼幸疇得疇失惟天生才大者丞弼胡成之艱  
而奪之疾惟士用世必先委質行孰我使止就我尼其  
間利鈍豈我能必公志旣畢公澤未訖公功在焉來者  
是述

明故贈光祿大夫柱國太子太保刑部尚書閔  
公神道碑銘

太子太保刑部尚書閔公朝瑛為監察御史時嘗獲封  
厥考竹深公如其官階文林郎贈厥妣嚴氏為孺人為  
都察院右都御史時公已棄養則如其官贈之階資政  
大夫而妣為夫人暨其祖考妣皆然弘治癸亥始贈公  
今官階光祿大夫勲柱國妣為一品夫人暨其曾祖考  
妣皆然公念父德久弗白茲假寵於朝制得建碑神道  
則以同年友請予銘公行具兵部尚書孫公原貞所撰  
墓表孫為進士嘗使浙採圖史為尚書又統兵鎮其地

與公晤接得其賢為深東陽生晚獲與太保公同舉進士與聞世德義亦有不得避也按閔之先本汴人從宋南渡至臨安徙居烏程之晟溪今湖州屬縣也元季兵燹譜逸不可考公曾祖諱某敦雅去俗為後進師表稱牧齋先生祖諱性考諱綬皆富善好禮為萬石長惠加於鄉公諱節字以度竹深其所自號少失恃克自樹力學通經籍工古今詩體每家居尊祖合族訓督子弟義敦舊故傭佃者厚議其直貸不能償者折其券值歲饑

解橐以周餓者給婚喪不舉者甚衆性易直人有過必加面斥而非理相犯者不為校鄉之人無遠邇疏戚必以長者歸之曰閔公厚德其後弗昌者吾弗信也嚴夫人諱貞字淑澄子六孫六曾孫九自某以下及諸曾孫皆公所不及見而來者尙未艾云予聞江南多鉅家望族而貴富不兩得若子孫綿衍久而彌盛者指不能一再屈意福祉為造物所靳非積行累善宜無所能致竹深公躬服德義不見用於時厚積大發固其宜也太保

公以才行爲三朝耆宿百僚冠冕揚顯之道於斯爲極  
論者徒見其恩所由起而培植啟迪之善鮮克聞之然  
則勒銘紀德雖緩至今日而具美備載若有所待而然  
者後之人尚亦有徵哉銘曰浙有封君家始由盛世歷  
三紀王三錫命其命維何御史尚書宮保載陟階穹禮  
殊山林廟廊韋布簪組旣晦而彰名徧天下誥增舊秩  
廟飾新主有宗暨嫺改聽易睹朝書暮詩我實教之生  
榮沒昌我實召之若田在耕旣稼而穫若桑於蠶旣績

而織以小喻大乃物之則此地之宜矧種斯德維德之  
效有倍斯百有秩斯綿由曾逮玄弗娛目前以慰九泉  
刻銘匪稽以俟厥全百世之下鬱哉斯阡

明故贈通議大夫南京禮部右侍郎馬公神道

碑銘

西充馬公諱覺照其字曰悟明其號曰圓山居士其贈  
官曰通議大夫南京禮部右侍郎其先出果州其祖元  
保寧路鎮撫月滿始遷西充其父愈音號龍門居士其



子鐸號虹橋居士為國子生三世不顯皆以號行及其  
孫廷用始舉進士累官南京翰林院侍讀學士獲贈其  
父及為禮部右侍郎乃贈其祖論者謂馬氏之顯自公  
始云公性朴厚與物無競且樂施予少喜浮屠法鄉人  
有小訟輒為開導不煩官府而退者徃徃有之嘗患舊  
塋卑濕躬相吉壤遷其祖若父於青草溝之陽廬於墓  
左負土植樹三年而後去有白鳩巢於墓木人以為孝  
感所致從兄庸為稅課司使卒於荊州公負其遺骸歸

葬之撫其孤不異己出蓋其家居所自盡者如此間遊  
江湖下瞿唐過金陵北走燕薊觀兩京宮闕臺署衣冠  
文軌之富慨然歎曰名教中固自有樂地也既抵家盡  
屏舊好遣子鐸為科舉業及孫廷用甫髫髻卽為擇傳就  
學步送於三百里外家雖貧膏火筆札之費不絕於道  
廷用攻苦力學舉鄉貢報未至而公卒公娶淑人朱氏  
勤儉有則善綜家政遇中表族姪並致親睦廷用之為  
編修也猶及見焉公生於永樂某年卒以成化某年墓

在岳店廟之東淑人祔焉鐸所卜地也公子二鐸其長次曰鑑孫五長廷惠授將仕郎廷用其次曾孫十金禽皆舉進士金累官廬州府知府禽吏部考功司主事全國子生企義官玄孫三蓋其子姓之盛如此而以女稱者不與焉馬氏居西南僻地世以農隱圓山公用儒學為教再世乃發至以父子登甲第內列曹省外領州郡文學政事先後相輝映而敦朴易直之風固未改也是其深培厚積理實有自致者豈直虧盈屈伸之數固當

然哉然則公之名已達之朝廷籍之有司見諸辭命典冊之間由是而託文字刻金石以昭來世固孝子之志亦史氏之所有事也侍郎君追慕先德久有待於今日者謂予為翰林舊寮特述事狀請銘於神道之石乃為銘銘曰西充之陰有山紫崖或若五馬從空西來有壤可居有原可藴生斯葬斯曰維馬氏龍門圓山是父是子載營載遷相望伊邇圓山有子惟孫是似子堂未構孫幹其蠱既錫其父貶及於祖龍章鳳函下照林莽山

若增高地若增牕彼俶豈遐若在畿輔九原有知公掌  
可撫穹碑巖巖金書石劖掛於新阡有來必瞻晦極而  
彰理則可占太史作銘以發爾潛

明故贈通議大夫都察院右副都御史畢公神  
道碑銘

贈都察院右副都御史畢公為教諭時以其子亨為吏  
部主事棄官就封後累封至都轉運使及亨為副都御  
史聞公喪歸自甘肅值今天子恭上兩宮尊號恩贈公

今官給正三品誥命制得遣官諭祭有司治葬事恩數備矣畢氏族望濟南之新城曾祖諱慶甫祖行二以行稱世有隱德考諱鐸贈如公官公諱理字文義生而魁偉重厚穎敏內發居鄉無師傅學禮經自得與旨為縣學生累試弗售天順己卯次當貢有伊某者親老且貧甚憐而讓之遂領山東鄉薦庚辰中禮部乙科授鳳陽懷遠學訓導懷遠久之科第公擇少俊十餘輩躬督教之自是舉者先後得二人以母喪闋服改保定東鹿舉三人秩滿考最遷

開封西華教諭西華之士如懷遠而舉如束鹿之數父喪服再闋改彰德安陽安陽多貴宦子不帥教公益嚴條格其舉者有加焉蓋公以篤志實學操矩矱為身教故隨厥所至類能有所成就四縣之士叩感恩德雖越地累歲視之若父母然其鄉黨後進經講授者多舉進士為顯官如御史孫敬于璧布政使李延壽此尤可指數者也晚號敬齋學者因稱為敬齋先生自致政歸以泉石詩酒自娛縣官禮請為鄉飲大賓者幾二十年年八十有一而

卒生洪熙某年卒以某年配高氏生同鄉有懿德孝敬  
勤儉少老如一日視側室若同氣撫育諸庶無異已出累  
封至淑人以今弘治丙寅某月日合葬於吳公山之原太  
淑人亦賜祭焉予五亨其長舉成化乙未進士累今官以  
廉能稱於時次成夔龍孝成龍皆縣學生孫五長昭弘治  
己未進士累官工部員外郎識者曰不愧其父自公以禮  
學教於家用是取科第者三世矣都憲君以予同朝久  
嘗接公風範昭又予禮部所舉乃奉吾友左副都御史



楊君應寧狀請銘公神道而以母德附焉禮也銘曰教士得第國課其最其所得者為遷陟地計功報直維有司事矧有遺教及鄉子弟匪我職者功實兼倍天則課之錫以繁祉其祉伊何曰有賢嗣維子父述維孫祖似教實自我成之在天天道國法若符契然貽我身後擊我目前官我能棄敢幾報焉校彼自得不盈一間匪流斯長曷泝厥原父教既著亦維母賢我銘畢公以耀九原

明故資政大夫都察院右都御史贈太子太保

左都御史史公神道碑銘

公姓史氏諱琳字天瑞在憲宗廟舉成化丙戌進士為  
工科給事中擢江西布政司右參議遷左參政孝宗朝  
歷遷左右布政使擢都察院右副都御史巡撫保定諸  
府兼督鴈門諸關歷工部左右侍郎兼左僉都御史經  
畧邊備以秩滿進右都御史提督軍務署院事今上皇  
帝以提督功贈太子少保左都御史未幾又以卹典加  
贈太子太保凡閱三朝四十年官十命其卒也給驛傳

遣官護喪治葬事賜祭者再及加祭亦如之蓋其始終  
遭際之盛如此可謂難矣初公為給事時言事有體為  
參議時平鞏昌番賊修安定會寧諸路邊備督甘涼軍  
餉事皆集以家艱闋服改福建有求開銀礦者公力沮  
之為叅政時豪家多怙勢庇盜每為禁治袁吉二府饑  
發廩賑貸全活甚衆贛盜攻城邑殺官吏督兵勦之獲  
七百餘人梟其首惡脇從者皆釋不問為布政時藩府  
歲祿多倍取民困輸納請自所司類輸之始大稱便為

巡撫時定均徭優戍卒開小河以殺潯沱水勢復真定  
保定二府柴夫舊額大明諸川果園皆居民世業嬖臣  
怙寵者奏取以備供應公力言不可以數千人之命供  
一己之奉辭甚激詔遣官覈實果如公言乃止為侍郎  
時嘗以災異言止織造惜供應諸事為經畧時言募軍  
丁禁盜賊省中官差遣諸事多行之為提督凡三命始  
赴宣府大同值敵退會兵食為後計後敵寇榆林率偏  
師先往暨大帥至共謀覘敵酋所在夜潛師搗其巢賊

聞礮驚遁毀其廬帳而還以捷聞賜勅褒諭副以銀幣  
寶鏹入朝言便宜事加詳弘治乙丑新遭大喪國事方  
劇適宣府失利遽命出師公與大帥分駐宣府大同大  
同諸路斬獲以百計捷再上褒諭如初特命中官迎勞  
於關賜賚甚厚下暨部曲並加犒賞殆近歲以來所未  
有也今年丙寅為正德紀元正月十二日以疾卒自居  
九列前後請老十餘疏輒得溫旨勉畱其在新政尤多  
眷注而勲業未究卒齋其志以沒悲哉公性本孝友其

先世居浙之餘姚元市舶大使應炎為宋防禦使張疇  
子去史為張姓七世矣公始請於朝復舊姓事其祖處  
士府君諱仲昇考教諭府君諱才甚謹皆累贈如其官  
顯其家調恤親黨不遺餘力其為人坦夷宏豁不設崖  
岸意常近厚人以故多親愛之平居不事作業家無餘  
貲然終其身未嘗以屑意也號一拙而實多藝能戲作  
墨竹自謂天解尤好談兵於諸推步占候醫藥之術靡  
不通涉比見熒惑犯執法謂人曰是必有當之者已而

左都御史戴公廷珍卒曰未也不踰月而公亦卒乃撮其大者為銘銘曰有偉一人生南東長軀廣顙聲洪鐘蚤占骨相非凡庸溺水不死驚羣童殿前射策回重瞳諫垣啟沃開宸聰關閩楚地三藩雄力折强暴蘇疲瘡手操憲節巡畿封入貳邦土官冬工豸冠象簡乘青驄出門按劍氣如虹部曲百萬皆貔熊三邊四顧多狼烽啣枚夜搖穹廬空五年再出威權同北走上谷西雲中胡來如雲去若風公歸獻捷明光宮臺評廟議坐雍容

武戢不用文治隆扶搖萬里方上翀六月一息何匆匆  
稽山鏡水精靈鍾公徃歸之可長終神無不之感必通  
或者尚在燕然峰

明故中憲大夫太常寺少卿兼翰林院侍講學

士楊君墓碑銘

國朝蔭錄之典惟大臣有之然不甚顯其顯者必其才  
足以應選舉膺任使資累序積乃得之而亦鮮矣若學  
士楊君知休固其人哉君諱時暢知休其字世望西安



之咸寧曾祖諱惟敬祖諱森皆累贈資政大夫戶部尚書考諱鼎舉鄉貢會試皆第一廷試第二歷翰林侍講官至資德大夫正治上卿太子少保戶部尚書贈太子太保謚莊敏君其伯子也少美丰姿能問學莊敏公為侍郎例得廕子君以讓其弟時達既舉進士授翰林院檢討修憲廟實錄以勞遷修撰充經筵講官今上在儲宮君以廷薦侍講讀改春坊右贊善九載秩滿進左諭德以修大明會典勞遷侍講學士續修玉牒以登極恩

進太常寺少卿兼職如故復以兩宮尊號恩進階中憲大夫預修孝廟實錄初開經筵復充講官其在成化時尚未顯越弘治正德間多所歷試史職之外會試為同考廷試為受卷彌封讀卷凡儒臣所有事無弗與者自餘若分獻郊壇陪饗太廟清理武官貼黃預觀籍田從幸太學賜坐彝倫堂恩禮尤渥玉牒之進君按宋制於正殿登受亦前所未有也其所被賜若冠服金幣寶鏤珍饌諸物不一而足卒之日上追念舊勞特命官致祭

營葬給驛歸其喪其長子依澤先以祖廕為太學生至是改命肆中書舍人業出身仍許其仲子依江補廕為生蓋莊敏雖以勲績聞望顯於時代而在翰林未久輒擢故編摩講讀之務所以遺君者猶多而廕錄相續又遍為序進固公以文學遭際明聖有足自致實莊敏之澤未艾也君為人內敏外重意常近厚倫誼尤篤莊敏之歸卽欲終養不果乃請侍以行張氏姊寡而無子養之終身後被旌為節婦譚氏妹有遺女為嫁名族諸弟

既失怙並加誨導時數為兵部員外郎時達為順天府  
經歷時數卒育其孤於官及君之喪羣從環列伏哭皆  
如禮亦以見故家風範如此云依澤將樹碑墓道奉左  
庶子毛憲清狀請予銘君同在院署久予弗能恧也因  
掇其行實之槩為序銘曰惟莊敏公昔事英祖肇登甲  
科終致台輔老歸其鄉弗究厥施教成於家有子似之  
孰其似之曰維伯子為名進士為世太史越在憲宗暨  
於孝廟今皇嗣基臣職是紹經業有門周象羲文史法

有傳鉞貶華褒講幄敷陳藝苑甄擇有一於斯皆公遺  
則有笏堆牀有里鳴珂仲叔之間孰與伯多譬室與田  
將獲將構而成弗終抑又誰咎惟卹有典兆域是營奕  
世遺恩二子是庸咸寧之墟先公所藏君往從之百世  
勿忘

懷麓堂集卷七十九

欽定四庫全書

集部

懷麓堂集卷

八十二

詳校官監察御史<sub>臣</sub>范衷

中書<sub>臣</sub>劉源溥覆勘

總校官編修<sub>臣</sub>王燕緒

校對官助教<sub>臣</sub>胡子襄

謄錄監生<sub>臣</sub>崔堂

欽定四庫全書

懷麓堂集卷八十

明 李東陽 撰

文後稿二十

碑銘

明故贈中憲大夫太常寺少卿兼翰林院侍讀

費君墓碑銘

贈中憲大夫太常寺少卿兼翰林院侍讀費君諱璠字叔玉

以子宏貴累贈如其官時其卒且葬已六七年矣宏既得誥命將樹碑墓道乃奉湖廣按察僉事姚君文灝狀復自述行實請予銘且謂盧於陵連舜賓皆以處士得文章而顯嗚呼若是則予惡敢當顧君之賢當不在盧連下故叙而銘之初公父奉訓府君蚤孤失學有五子各授之業珣字伯玉舉鄉貢士瑄字仲玉舉進士累官貴州布政右叅議璵字季玉為義官瑞字幼玉亦舉鄉貢公其叔子也當伯玉蚤世府君亦棄養仲玉已遊縣



學以母嫂寡弟妹皆稚委君家務卒國學業以成其名  
府君止一弟有羸貲悉付之其沒也無私藏焉君入給  
家費出應公役勤苦百狀久而貲益饒外侮皆至隨事  
扞遏強暴者更為屈服曰費氏有人矣君痛弗逮父養  
以母王太恭人多疾躬習湯液儲善藥以備之逮事繼  
祖母張孺人晨夕候問手其肌膚寒煖飢渴類不後所  
欲曾祖妣王孺人墓為盜所發遺骼散落灌莽中一一  
掇拾內諸故槥禮事兄嫂幼弟病親為扶掖至察其穢

器弟嘗沾醉濡首奪其杯擲之其感勵有成亦以此後  
歸自京師病益甚冒暑迎之失於揚州間已至鎮江反  
渡而南則知尚在瓜洲日暮風甚舟人請少俟君曰吾  
弟忍死待我遑卹其他亟欲渡而北及見握手語數刻  
而絕撫其孤孀尤篤聞有盜警亟叩寢閣抱之出窩猶  
未寤也理家四十年下上輯睦如一日晚與仲玉定家  
規至今行之其為人英雋而善檢飭自謂有三不惑每  
歲荒輒減價出糶有笋舟覆於潭為漁者所得家僮利

其賤市之蓋自是不筭食者數月故鄉人德之最深當  
病殆為之社禱者數百人非公事不至城府母黨有請  
託者業已得賄以母命強君君代償所得竟弗為動君  
通堪輿家學葬二親於金相之原配余恭人先卒別葬  
於楊梅尖而君葬於天柱峯皆所自卜地也君世家廣  
信之鉛山曾祖諱廣誠祖諱榮父諱應麒以仲玉貴封  
奉訓大夫兵部員外郎子三人其長宏也狀元及第在  
講筵史局蔚為時望於是天下稱之曰費氏有子矣次

完縣學生次審早卒孫幾人孫女幾人長許宜興吳驥  
今翰林侍讀學士克溫子也銘曰費氏五玉玉總良其  
一韞匱山中藏平生執德不毀方人有譽重無疵傷沽  
哉沽哉價莫償寧為橫棄官道傍恥以泣獻封陵陽種  
為王子森成行前如藍田後崑岡如揚瑤琨雍琳琅中  
最貴者登玉堂為璧為瓚為珪璋為世物瑞為國光佳  
城有埋厥壤黃寶氣融液天無霜後千百年闢精芒生  
舅欲莫遠可將貞珉著德永不忘

明故嘉議大夫南京都察院左副都御史陳君

王汝神道碑銘

王汝姓陳氏諱璫王汝字也世為蘇之長洲人舉進士為翰林庶吉士擢兵科給事中歷遷刑科都給事中大理寺左右丞左右少卿兩京都察院左僉都御史以左副都御史致仕南京卒於家王汝居官謹飭不事矯亢言必據理法在諫垣封駁惟允孝宗蒞政初妖僧繼曉既就逮法司擬以常典王汝與同官暴其罪乃伏法有

妖人惑衆通寇奏令巡撫憲臣禁絕弊源因請置天下社學以端蒙養則邪慝不生有中使手擊尚寶官於朝具狀劾之彭城伯為幸臣誣奏為辨其非罪當道欲令以齒頰報怨則謝弗能雖以召怒弗卹也在理寺最久詳讞為多在南臺兼督操江兵上自九江下至沿海歲再巡歷過其家必奏焉而後入周府莊地與屯田相錯奉勅往勘歲久籍去軍衛不能直因兩具以請中旨歸之府而議者弗察乃著屯田十二難以著志復勘吉府

獄下上無間言再入南臺會海賊為孽與巡撫官議先  
撫諭首惡出降業已許不死發戍嶺南後賊黨大肆更  
化初方議勦捕而王汝已沾疾謝事去矣禮部以訃聞  
上遣官諭祭命有司治葬事丁卯十一月某日瘞於隆  
池山之原子四鎡鑰鍵鏃孫八濤早世次淳津汭洪泓  
洵汭玉汝位不稱行若為造物所詘及歸子姓蕃碩  
至不能猝辨乃作頷孫之堂亦衣冠盛事云初王汝為  
生從吳文定公為古文歌詩弗屑程試試京闈有司錄

其論以傳予同考禮部初試已落之榜時策問涉僻事  
闔場莫能記惟此卷備舉不失一字遂寘上第入翰林  
為諸老先生所器許而選授不及雖得要地每公暇未  
始廢學所著有成齋稿使歸有二上錄三上錄其詩清  
簡有思致文亦如之玉汝謂予為知已以文字友甚習  
故鎡以治命走京師迄銘神道予悲而銘之銘曰吳文  
獻地文定其首陳君視之義則師友鄉評以行省試以  
文有言孔揚吾得其人其人維何玉以比德琢汝器汝



為主為壁木天石渠有圖有書何以用之校閱之餘諫  
垣有議樂司有比隨所歷試亦足致理經與律判中  
世已然一之謂難而況其全人亦有言清則弗要二不  
可無一不為少志所弗屑若或強之所未竟者莫或廣  
之知人實艱惟我與子既錄其生復銘其死

太原王氏柳林世墓碑銘

柳林阡者太原王氏世墓也王之族系出周靈王太子  
晉代有顯者而譜燬於兵無所考見元有子實處士居

邑西之蠶石生二子長處士均圯次良仕元知潞州兼管本州諸軍興學勸農事有惠在民老而無子以兄子伯聚為後至正之亂故家大族焚掠殆盡伯聚自山綦別墅亦襁負子女避亂於外及國初肇定版籍始卜居柳林家復振永樂間歲歉嘗出粟貸貧餓活數百人後有歸直取券者則既已焚之矣鄉人德之壽百餘歲二子長寅舉鄉貢士仕鳳陽真定二府通判有廉能聲擢知隴州以老致仕而卒三子永吉永泰永昌皆以耕讀

為業次安質直好義舉人德之若其父然壽至八十有九二子長永壽舉鄉貢士累官資政大夫正治上卿南京工部尚書巡撫湖廣提督軍務有平寇功行業聞望為一時所重贈其祖若父皆為資政大夫工部尚書次永亨有大志折節讀書亦以鄉貢士知昌黎縣遷知隆慶州性嚴毅未嘗苟取比致仕歸無贏貲人以古先生稱之以子瓊恩授封誥進階奉直大夫協正庶尹壽至七十有二今瓊累遷戶部右侍郎文學志操於前有光

而贈錫之典蓋未艾也若其先塋舊傳邑西柳谷南之蠶石者久失其處而其子孫皆散亡弗祀潞州以下始葬柳林之南二里許則伯聚之所遷序以昭穆至今不紊尚書公之卒朝廷賜葬於邑西店頭之原其子孫皆祔之別自為序蠶石之阡瓊近已求得之將圖修葺以廣祀事獨柳林之墓幾二百年最久且盛而未有表識之者蓋於此深致意焉惟王氏居土厚水深之地宗族蕃衍閱代累世皆能以忠厚樸質為業故壽富榮顯年

有過百齡官有登六卿者蓋其所稟厚而習與養之善也至其墳墓所在兵荒轉徙之餘猶秩然不失其序而修治秩祀禮亦有加焉仁孝之澤自是其有窮乎養生送死王政之大端而公卿之家佐政以化民者其責尤重是不可以不識也戶部君念潛德弗著自述事狀介喬禮部希大請予文刻於麗牲之石且以備家乘之傳乃銘以系之銘曰鬱彼柳林山崔巍巍兮葬其下者塚累累兮惟州有侯相厥宜兮爰復爰處歸流離兮數窮

則通福履綏焉侯子侯孫曾玄隨兮其生維斯莫亦斯  
兮昭穆序列儼庭闈兮翼翼卿佐皆穹躋兮由枝逮根  
雨露滋兮維柳之陰若彼槐兮繫彼在谷復弗迷兮禮  
有小宗繼別為兮體魄在焉魂何之兮自西自東往復  
來兮刻石紀德我豐碑兮

明故中奉大夫廣西布政使司右布政使伍公  
神道碑銘

廣西右布政使伍公卒於家其子湖廣右布政使符具

書寓公從子進士箕上京師介翰林庶吉士張鰲山請  
予銘神道之石越數月其孫工部主事全來速銘予與  
公同榜相知好音問久弗達聞訃哀悼不忍辭伍氏世  
居吉安之安福元季有性中者以鄉兵扞州里生於洪  
武國初以春秋舉進士為臨清縣丞是為公高祖處士  
諱述經者為公曾祖知樂清縣贈監察御史諱冕者為  
公祖封刑部員外郎諱體祥者公考也公諱希淵字孟  
賢少敏悟季父御史驥奇之言於刑部公俾與從弟希

閔同受世業一日塾師請辭曰吾不能為二子師也天  
順己卯公舉鄉貢癸未試禮部彭文憲公以春秋宗一  
時適主試事擢公為第四人經義梓行者不竄一字甲  
申登第二甲進士授刑部四川司主事未踰年尚書以  
為能令勘獄北畿歸輒稱旨有大臣薦為按察僉事例  
以資格弗許遷員外郎進陝西司郎中決南畿重辟及  
錄浙江繫囚多以開釋復薦為大理寺丞不果有中貴  
臣銜命讞獄尚書以下皆噤莫敢抗公執論侃侃麾之



不肯退坐是賈怒尋以註誤出為廣州府同知會後山  
有劇寇承檄與按察使陶魯分路進捕多所擒獲勾稽  
軍籍陳便宜二十事御史而下列郡行之民相與語曰  
非伍貳守幾不可為郡矣傳聞京師遂擢知府事公益  
自展布事無劇易務力為之嘗相水作陂堰多積穀為  
儲蓄置保伍使民自相扞衛徵科差役必審定丁戶凡  
所規畫有至今存者獄訟尤所素習辭察面折庭無留  
案興學表善取鄉先達遺文刻於郡齋時集諸生稱說

經史以風厲之登上第為顯官者踵相屬每部使舉郡縣能吏必為稱首一月間吏部連擬雲南按察副使及湖浙叅政皆不果弘治己酉九載考績王端毅公為吏部方欲進用而巡撫都御史請還公舊治乃擢廣東右叅政諸路習聞公名皆安其教令不敢犯乙卯遷廣西右布政使取道歸省遂丁刑部公憂繼母劉宜人亦喪家居數年公亦謝事不復仕而子符已進雲南右布政使為用事者所中就理浙藩既而用事者敗始得白

歸比有後命公已屬疾踰旬而卒公寬厚豁達不設崖谷而中有介辨解紛治錯皆談笑為之雖專城牧長若不盡其用者事繼母甚孝謹撫二弟遺子女皆底成立官所入俸廩為奉養賓祭費餘輒以分子姪暨諸姻族賻喪結婚不可勝紀學士大夫謫嶺南為所周恤者或祠而祝之廣人過其鄉不遠百里必通問候其交際之得人深如此公生正統某年卒於正德某年葬於某山之原子六皆踐世職有聞於時孫五長全舉正德戊辰

進士授今官次全會倉令蓋自臨清及御史君而下舉  
進士者一人鄉貢者一人族望名第之盛亦世所鮮見  
云銘曰維廣東西維國鉅藩比壤殊俗政通實難公官  
其東長郡參省十年再遷維西牧是領繭絲之能保障  
之功政體則然匪才弗同維古有云以經飾吏甲科之  
儲刑曹之試政久乃成世亦曰爾有明弗涉則命之使  
鄉有文獻家有範模公德不孤來者其圖之

明故湖廣布政使司左布政使劉公神道碑銘

吾湖南有藩臬之長曰劉公諱喬字述憲吉之萬安人也其先出河南祥符宋季曰功甫者丞萬安家於官曾祖昭祖俊英皆贈刑部尚書考尚書公諱廣衡為累朝名德公其次子也成化丙戌登進士第知湖之歸安歸安壯縣公應手剗折獄無滯囚苗死澇而鄰邑早不可植公教民市其苗植之獲再倍每東作躬歷田野徒步入里社問民疾苦默詢其家豐嗇人資不肖賦稅獄訟率視此為據吏不得售其姦禮葬喪俗士家以佛齋致

饋却弗內富民送葬妓樂數十則罰以示戒癸巳召為河南道監察御史按廣西荔浦徭叛檄藩司守臣平之柳慶田三府多警凡所指畫動中機會還按京畿稽諸司卷籍無所縱壬寅擢福建按察副使發隱摘伏屬吏畏服有大俠私畚射利盤結下上莫能制亟斷遣之弘治戊申以外艱闋服擢湖廣按察使持法甚謹庚戌用刑部尚書彭惠安公薦遷右布政使辛亥轉左布政使則壹尚寬簡盡除苛厲人或訝之曰牧道固是也會修

三王府極力綜治民不告怨勘諸府獄事皆得理蓋自  
筮仕至是勤勩舉職未嘗少逸間代祀南嶽力疾以往  
還至薜洲卒子四玉奎璧璜玉本季弟之子也初公未  
有嗣故子之後舉進士累官御史紹公行業以考績給  
誥命公當進階而所司失據僅授中奉大夫公之葬也  
僉都御史林待用為銘玉間請予銘諸墓道予省墓過  
浙聞人道歸安政績甚悉知公久矣茲於義有不容辭  
者乃為銘銘曰有湖在南楚邦是瞻藩臬之間有牧有

監有賢實多來者踵接前過後績功施惠浹仡仡劉公  
有言有功植我善柔蘇我病瘥星霜六周亦距非久民  
無訾謗譽則多有我居北方顧懷舊邦曷其徵之於我  
父兄父為尚書子為柱史何斯人斯是父是子汗竹有  
傳甘棠有詒麗生有碑邦人之思

明故贈光祿大夫柱國太子太保吏部尚書兼  
武英殿大學士焦公神道碑銘

吾友少傅焦公孟陽始入內閣加太子太保吏部尚書



武英殿大學士特賜誥命封三代獲贈曾祖金德公如其官又為光祿大夫柱國如其階勲欲樹碑神道以昭潛德乃屬諸東陽而歲代綿隔事行無所據惟述其祖光祿公之言曰吾父事親能竭力共養與人和厚有令聞於鄉又常謂芳輩曰予幼時吾父以為可教每攜以自隨方值草昧士未有定業家不蓄書教小學四書皆以手畫地口授耳命旋為講解不一存筆跡故人無知者嘗中夜語予曰元季之亂南北擾攘強暴四出蕩無

統紀者幾二十年中原人民自為吞噬死鋒鏑者踵相接即不死則死於道路溝壑之間幸而存者不十一而子生其時未嘗去廬舍墳墓居與鄉人樹柵相保宗戚百餘家皆藉以無事遂能存亂後之身以承先世之蔭以遺爾曹殆若非偶然者今又值聖天子光復古帝王禮樂之化爾生斯時宜學以待用則以忠信仁義修其身以淑諸人人而進退之際尤所當慎爾其識之亦以教爾子孫予謹識之不敢忘用是官不過九品年僅踰

四十而即退耕於野以成先訓然察吾父之意不獨在予實有望於爾後之人爾後人者不可以不知知之不可以不勉也芳聞曾祖語意於吾祖者僅僅如此他莫能悉也東陽乃起而歎曰嗟乎歐陽氏徒以一婦人數語而表德於先世取徵於後代矧父祖孫曾問學德業相授受若是其明且遠哉蓋天地之道虧盈否泰循環而無窮自開闢以來一治一亂至於元季否亦極矣我國朝掃除戡定休養煦育百四十餘年日趨於盛於是

乎有重熙之世以一家言之積德累善閱世歷代而不  
試試亦不顯既久而得今少傅公又出於翰林之儲養  
州郡之敷歷愈久而後大發焉乃以耆德碩學尊官重  
望簡於朝廷耀於天下於是乎有三孤之貴三世之封  
雖其淳蓄培植有足自致而遭逢會合於千載一時之  
盛固亦非偶然者哉然則公之高識遠見至今而始信  
而其為人亦從可知已公諱成全德其字世居南陽之  
泌陽有曰義者仕元為萬戶抗志不合棄官而歸其後

遂相率不仕云銘曰維國之初如日方曉維桐柏之陰  
宿彼靈鳥其章弗耀維九苞是荷有雛翩然覽德而下  
倏還故棲亦戢其羽維予孔似維孫實旅其儀楚楚其  
行舉舉復有名孫出於治世維時之靈亦維邦之瑞紛  
彼羽族實拔其萃衆雖從之趾美方繼以今校昔何顯  
何晦維古有聞莫克見之考跡審象於書於詩維國之  
初代亦遠而見其子孫宛爾其儀取物以德闡義以辭  
匪鳳斯銘維斯人之碑

明故光祿大夫柱國太子太傳吏部尚書致仕  
贈特進左柱國太師謚端毅王公神道碑銘

自古凡治朝盛世必有恢弘博大之臣布列廊廟陳昌  
言著偉績顯於天下播在史冊以傳不朽然不可遽得  
求什一於千百得焉亦足矣自我英宗皇帝旁求賢哲  
其所敷遺閱憲宗孝宗累數十年時則有若王端毅公  
固其人哉公諱恕字宗貫陝西三原人也正統戊辰舉  
進士為翰林庶吉士授大理寺左評事景泰間遷左寺

副條刑罰不中六事上之朝擢知楊州府屢辨疑獄歲  
飢發廩不俟報且給醫藥多所全活作資政書院教羣  
子弟科不乏人天順間遷江西右布政使楊人為立石  
頌德廣賊寇贛州公帥兵勦平之遷河南左布政使成  
化間擢都察院右副都御史撫治南陽諸府南陽豪爭  
礦殺人公獲其魁餘悉解散以內艱去會襄陽盜起詔  
公起復會兵搗其巢走之及劉千斤輩作亂公亦會王  
師勦平之大帥欲縱兵搜山公不可因下令曰擅殺者

斬復榜示流民諭使復業民為建生祠繪像事之乞終  
制不許尋奉勅巡撫河南遷左副都御史歲旱蝗上疏  
請崇儉去奢以回天意入朝言時政六事遷刑部左侍  
郎丁外艱服闋改刑部巡治漕河成言弭災數事未幾  
而蠲租之詔下矣改南京戶部再改左副都御史巡撫  
雲南進右都御史以地切交趾言禦夷方略劾鎮守中  
官諸不法事沒其部下所得金寶輸之京師勲臣世帥  
亦為斂戢所役官軍土民皆還部業使人至夷方無敢



索賂勢家假驛傳般私貨者皆自雇役於是聲震遠邇  
改南京都察院參贊留務兼督巡江尋改南京兵部尚  
書考選官屬不受請託為同事所忌命兼左副都御史  
巡撫蘇松諸府會江南地震乞歸不許言內外官收納  
過重請為禁草光祿寺歲供白粳概及庖人賤工請為  
分別派買物料織造綵幣及貢獻禽鳥花木請為節省  
又請免常州夏稅六萬餘石以羨米還之又以補諸府  
戶口鹽鈔六百萬貫又以水旱災請免秋糧數十萬草

半之以宮田賦重減耗米十餘萬發廩賑饑民令減價糴穀又同行賑貸以戶計者幾二百萬以口計者有加焉有中官以買書收藥為名搜括遍江南千戶王臣者為之助惡公累疏言之上乃命械繫中官泉臣於市而中官亦誣奏公及知府孫仁仁就逮公又力救之得免又請罷內降官數人又以京師地震乞辭位不許尋復改南京兵部尚書仍叅留務聞秦晉飢言便宜十事聞林俊張黻之謫乞還其官因請罷永昌寺役加太子少

保言政令必信不宜數改語尤激旋落太子少保以尚書致仕孝宗在東宮已聞公名既登極首降勅召之改吏部尚書加太子太保階榮祿大夫臺諫劾巡撫及藩郡官奉旨黜革公以為不得其職連疏乞休皆不許南臺薦公可入內閣上曰朕用蹇義王直故事委恕吏部若有謀議亦無不聽乃已弘治初從耕籍田預九推禮視學命下公請釋奠用爵用三獻分獻官致拜上許分獻行拜禮公又爭之乃於孔子加幣用太牢改獻為奠

至日分奠鄭國亞聖公侍經筵偶議不合辭印乞休上  
曰君臣之間恩同父子各陳所見何嫌何疑可視事如  
故乃起就職屬有疾上命醫診視遺中官賜酒米諸物  
南京給事中周絃御史張昺奉命點軍為留司所奏出  
補外公論掾之未得命臺諫交奏以為老臣言當聽絃  
昺乃得改南京別任徵王奏知陞鈞州為府晉王乞為  
世子別設典膳皆論止之知州劉概與御史湯鼎言涉  
狂誕當道欲坐以死御史李典多枝罪人至死亦坐重

辟公皆論救乃從末減山西叛賊王良等既伏誅或議除其黨千餘輩公以為脅從宜免議始定又請老詔大風雨雪免朝又免午朝復以慧見自劾求退不許進階光祿大夫勲柱國封三代有旨令中官會選御醫公執不可壽王冠克副使都御史秦紘以總督兩廣軍務奏安遠侯柳景不法坐致仕去公極言紘當用乃起為南京戶部尚書大賢院判劉文泰者奏公不當令人作傳議者以為有所受公具自列乃下文泰獄降御醫公又

乞休蓋自蘇松以來前後疏十餘上乃賜允命給驛還鄉有司月給米二石歲給夫役二人賜寶鏹三千貫居十有三年聖天子登極詔賜牢醴遣行人存問於家復加米及夫隸數倍於昔且賜璽書有嘉猷入告語公復上疏言數事正德戊辰某月某日卒於正寢壽九十有三矣訃聞上震悼贈特進左柱國太師賜謚曰端毅遣官諭祭者九令有司給棺槨治凡葬事公墓在西園尚書府君墓次其所自卜地也子曰承祚為義官有丈夫

子五人承祜南京前軍都督府經歷早卒承祿義官承  
祥順天府通判承禋亦為義官承裕舉進士累官吏科  
都給事中孫十三人某某公平生好學博涉經籍至老  
不倦所著有漕河通志介菴奏議石渠意見經籍格言  
行於世承裕予禮部所舉士因奉戶部尚書劉公用齋  
狀來請銘是惡可不銘銘曰巖巖華嶽雄鎮秦封靈秀  
攸萃為人中雄端居廟堂進退不辟高舉長步直言正  
色奮翼而起排雲厲空紛彼羽族瞠其下風羣疑糾紛

中有定括南山可移三軍可奪用我則出舍我則還外  
若可挽其中浩然秉彛在躬弗枯弗失其所餘者以還  
造物拄車守閭世豈無才持以大用匪違則乖滔滔江  
流中有砥柱頽波狂瀾不見其處功名始終自古謂難  
我所自立其成則天國史有書鄉賢有祀公銘不隳公  
墓在此

明故正議大夫資治尹南京工部右侍郎徐公  
神道碑銘



弘治乙卯公以都察院右副都御史巡撫湖廣一日忽有中旨遷南京工部右侍郎公聞命駭愕亟上疏言臣平生不敢自他途以進乃今名不薦於廷臣銓不由於吏部臣之心跡何以自明乞收新恩以全晚節因以疾告先皇帝優詔答之乃就職又再疏請老弗許戊午獻績於朝疾遽作又請乃許給廩驛而歸言事者往往起公不果癸亥三月七日卒壽七十三遺戒子孫勿乞葬祭甲子歲未盡一日寔於鳳凰山姚塘之原後馮御史

允中按南畿表公名行為請卹典朝廷乃遣官諭祭命有司治兆域嗚呼觀公之終可以知其始矣公在成化丙戌舉進士為工科給事中諸中使欲領郊關抽稅公與同官言不可遂遣諸給事往蒞意因以寤之會公在遣中摭拾無所得乃止乙未擢湖廣布政司左叅議值兵荒後加意撫卹民賴不徙有中使採竹笋諸物責非所產地公移文止之甲辰秩滿遷河南右叅政陝西饑當運粟數萬石民苦遠公請出粟易銀畀之弘治戊申

進右布政使遷左布政使有藩府承奉司制置吏公勒  
停之會計財賦謂費用寔廣歲入且弗給乞少節京運  
以寬民力庚戌河徙開封有奏遷藩會者公條陳不可  
事亦竟不行辛亥遷都察院右副都御史巡撫河南旱  
溢交作公請減秋稅省織造折鹽課有藩府據魯山民  
業公承命會勘議歸之民戶部督積逋急公以災變請  
緩其事有言官請割漢中鄖陽夔州諸府別置布政司  
公亦言不可鄰境民來就食發粟賑之所活甚衆尤重

名教令歸德修微子祠彰德建西門豹祠洛南祠范文  
正又令諸州縣學秩賢哲無文者公名益彰而忌者日  
益甚再乞歸不許於是有湖廣之命兩河士民夾道攀  
送哭聲聞數十里布政有羨銀三千兩舉以為贍公一  
無所納至則有中使載私餼百艘抑市於民為公所持  
比去乃得市云公器宇凝重不事矯飾而中所操執介  
介不苟雖優仕不倦問學自輯所為詩文奏牘若干卷  
藏於家修家規以合族子弟雖頽白無敢肆者其高年

令德蓋非特一郡之望也公姓徐氏諱恪字公肅蘇之  
常熟人祖德賢考納皆贈都察院右副都御史子四緹  
先卒次緇次緝緇緇上京請銘刻於神道之石曰治命  
也予與公久同朝每見公奏牘輒歎羨不置重其為人  
乃為叙及銘銘曰國有四維庶乃一士而弗庶曷自律  
觀德之隅如彼室徐公手持法三尺威來如山氣不屈  
深言遠計心在國羣猜衆忌不我卹避嫌遠恥如有激  
母我身貴隲我節臺高省巖出復入身雖廟堂志巖穴

旋亦棄之如屣脫乘堅驅良虞顛躓蠅營蝸爭竟何物  
公恆謙沖斂不伐康寧考終多類錫天寶成之豈人力  
吳山之原閔元宅家有脣系廟有食後千斯年保貞吉

懷麓堂集卷八十

欽定四庫全書

懷麓堂集卷八十一

明 李東陽 撰

文後稿二十一

碑碣銘

明故陝西寧州知州贈光祿大夫柱國少傅兼  
太子太傅吏部尚書劉公神道碑銘

漢之守令多久任至長子孫或十餘年或二十餘年然

不數見在我先朝法令近古其最久者時則有若陝西  
寧州知州劉公蓋三十二年然後去前此未之有也公  
生於洪武某年登鄉甲科三十三而為縣三十六而為  
州七十而致仕至八十四而卒又五十一年贈今官於  
是寧州之名益加顯公諱綱字文紀其先自漢更始時  
居潁川有曰元者避亂居嵩南至建武初占籍於鈞州  
今河南開封府地也唐以下譜逸不可考公高祖諱某  
曾祖某祖某考某贈如其官公生而孝友敦確有幹局



初為縣得延安府之邑俗號難治教法並舉頌聲大作  
及為州州人聞公威名皆色懼公至則曰久敎之地刑  
非所先乃因俗為治不專繩墨民翕然樂之民未識樹  
藝教以播種民未知學問教以詩書植善鋤惡習為之  
變既又均賦役置屯田簡兵練武百廢俱振以內艱去  
代者已至民不忍釋公詣闕請留太宗曰民既念綱可  
令起復乘傳之任而別用代者公心喪蒞事未嘗輕用  
罰而民不忍犯經鞠問者退無異詞嘗署按察司事旬

日間屢釋冤獄州有龍尾湫時出光怪遠近聚觀公伺其光動手射之應矢而滅既而洩其水乃巨龜也怪遂息間行野中值橫石為虹馬驚不度公諦視之蓋狄梁公碑范文正公所撰者也即起豎之為建祠焉其他善政多不可殫紀此其異者耳間又嘗丁外艱考績者殆十數皆以州人奏留而官亦不調仁宗朝特賜璽書表異及四品章服嘗至京師上親召問勞以酒饌時人榮之英宗朝以老乞休章數上乃得致仕去之日哭聲振

野州舊有六君子祠祀狄公以下嘗為刺史者民生祀  
公其中改名七君子祠及家居遺問踵至其卒也有裹  
糧致弔者焉其得民心如此公配某子某孫三長為光  
祿大夫柱國少傅兼太子太傅吏部尚書字舉成化壬  
辰進士累今官材行勲績偉然時望為今天子所簡任  
其贈三代以此公葬于某山之原少傅公既貴欲遵典  
式立石墓道以昭不朽自述公狀請予銘予惟世之論  
有後者必曰位不稱德君子固未嘗責報于天而理有

不能違者夫積久而發發必大公以平生所學專施于一方官不過郡守再世而少傳公出焉又以言事被謫越數十年然後顯不可謂不難矣今舉甲第者三世在仕籍者四人文武並用中外相映方承而未艾有家之盛鮮克過之是不足為為善者勸哉銘曰

陝之西疆有州曰寧爰有賢守來侯其氓氓有素願侯實營之氓有外侮侯則櫻之三十二年政舉人存不食而飽不衣而溫氓之戴侯我父我昆氓之頌侯侯子侯

孫侯子既善侯孫乃發內秉政柄外著功伐文揚武揭  
其聲烈烈莫為之後有播誰獲一郡雖小其名則長沒  
為三孤身後之光嵩洛之間有河湯湯公澤斯流百世  
勿忘

明故資善大夫太子少保吏部尚書致仕贈太  
子太保許公神道碑銘

有居大官當重任仕而人望之退而人慕且薦之沒而  
人惜之若不盡其用者是惡可強合幸得益必有所由

致即是而觀不待接其言攷其世其人可知也若河南  
許公固可誣哉公諱進字季升舉成化丙戌進士擢監  
察御史出按甘肅山東風裁卓卓都御史陳鉞附大監  
汪直啟釁遼東為御史強珍所劾公亦率諸御史論之  
珍被逮謫戍公與凡劾鉞者皆奪俸三月選山東按察  
司副使監鄉試事有欲私貴家子者執不從東昌有武  
官子懷金挾一儒生飲于酒家是夜被殺有司疑生所  
為備極拷訊生誣服公徧閱商歷見酒家以殺之翼日

買布數尺訊之遂伏辜弘治戊申遷廣西按察使未上  
擢都察院右僉都御史巡撫大同贊理軍務上邊事數  
條比邊入貢驕詐百出公嚴為節制遂不得逞武邑王  
驄沐不律公奏置于法降為庶人又奏大監石巖巖誣  
公擅用旗幟降知兗州府甲寅遷陝西按察使寇犯西  
陲復命公為左僉都御史巡撫甘肅吐魯蕃世仇哈密  
遣部酋逐其王入據其城久不復公與都督劉寧輩出  
調齊勤罕都諸夷為聲援冒雪夜進城中人從亂者餘

八百登臺自保公諭使下或欲盡屠之公不可乃止丙辰以功遷右副都御史巡撫陝西不屈權貴召入為戶部右侍郎刑部主事鄭岳下獄不以罪公疏白之彗見公會奏修省數事庚申寇入大同復命兼左僉都御史提督軍務與平江伯陳公銳出師進勦陳以無功獲譴或因以累公遂令致仕歸數年廷臣論薦者數十疏乙丑今天子即阼召為兵部左侍郎督團營兵馬進尚書賜莽衣三襲正德丙寅公上疏請勤聖學戒遊逸改吏



部尚書賜玉帶加太子少保方逆瑾擅政事多齟齬時  
傳公議瑾寢不能容乃以署員外郎再署郎中者誣為  
非制謫令致仕又以公嘗薦雍泰為失當除其名而怒  
猶未解又摭其在大同時嘗籍軍丁出銀僱後後為典  
守者所尅故苛為稽察因以中公幾至不測事未結而  
瑾敗朝廷用言者復公官仍致仕而公已卒矣乃贈公  
太子太保遣官諭祭命有司治葬事焉公器宇魁崖負  
抱甚偉論議胸出若無不可為者法尚嚴峻凡有請託

多拒不行見者敬而畏之顧性孝謹嘗被庭訓撻指出  
血後每舉指示人輒感泣不已事二兄禮敬不替家素  
饒而自奉儉約至于老猶然所著有憲臺奏議平番始  
末東崖稿東崖者其所自號也公生某卒某葬于城南  
石嘴山之北麓娶某生子某繼夫人高氏生誥舉進士  
擢戶部給事中改翰林院檢討調全州判官讚亦舉進  
士擢監察御史改編脩調臨淄知縣公高祖某曾祖某  
祖某皆以公貴贈如其官其上世譜逸莫可考一日于

瑩域隙地得許五公墓誌稱隋楚州刺史法光唐譙國公裕左相國師有五世為同州刺史八世為宋端明殿學士簡其子東遷長安又四世為金兵馬都元帥威西征過靈實愛其風土始居焉又再世為元百戶玉則五之考也于是許氏之世系燦然復完人皆異之公且葬誥至京師奉禮部右侍郎李公希狀請予銘銘曰

陝重周甸地分東西西有名關山川崛竒代生偉人出為世用屹屹許公有威有重肅肅內憲嚴嚴外臺有劇

必折靡強弗摧赫赫天曾百官是統震撼擊撞有震無  
恐仕我已我其機在人怨不尤在我者存明揚在廷  
嘉遜于野既老而傳非徒壽者膏之沃矣有曄其光維  
源之深其流則長物則有然于人為大我最公名昭于  
一代

明故通議大夫禮部右侍郎管國子監祭酒事  
致仕贈禮部尚書諡文肅謝公神道碑銘

吾友方石先生謝公卒且塋既閱歲予始得銘神道之

石非忍為慢重之也公諱鐸字鳴治別號方石台之大  
平人少為縣學生天順己卯舉鄉薦第二甲申登進士  
第八翰林為庶吉士乙酉授編修成化丁亥預修英廟  
實錄成陞從七品俸乙未秩滿遷侍講仍加從五品俸  
戊戌以家艱去既免喪謝病居數年弘治初臺諫部屬  
言事者交薦之會以修憲廟實錄徵乃起供職庚戌擢  
南京國子監祭酒辛亥致仕歸薦者以十數特擢禮部  
右侍郎管國子祭酒事命吏部遣使即其家起之公再

辭不得道得疾徑歸復請而敢迫日益急乃行至京師  
辭所加職以本官治事亦不許居二年辭至再癸亥修  
歷代通鑑纂要命為潤色官疏又五六上復乞歸養疾  
乃許命給驛以行命有司俟病愈聞奏正德戊辰吏部  
例上其名會權姦用事恐其復起遂仍致仕某年月卒  
蓋公出處履歷之緊如此可謂得其正矣公為編修時  
嘗奉旨校勘通鑑綱目上疏言神宗喜通鑑理宗好綱  
目而不能推之政治因勸求賢講學以史冊質經傳窮

義理則大本立而萬末自隨矣為侍講撰經筵講章必盡所欲言者在南監時動以身教每嚴約束禁諸生班見禮捐皂役錢以沛僚屬籍膳夫餘錢于官購東西二書樓以度鏤板上疏請增楊龜山從祀而黜草廬吳氏餘若擇師儒慎科貢廣載籍復會饌均差遺論列尤多在北監請增號舍修堂室又謂廟門衢面多狹斜以為褻慢買其地而廓之又買官廨三十餘區居學宮以省儉直皆出夫皂雇役餘悉藉為公用諸生貧困者亦有

給死者請京府致賻給驛歸其喪又別祀叔梁紇曾皙  
顏路孔鯉配之以全倫義而議黜吳氏者尤切皆不果  
行凡所建白皆師古義持獨見未始有徇俗希人之意  
雖尊官要地忌者不能無而輿論所歸若出一口其辭  
則相率請留其去則爭為論薦如輸粟納馬諸途素為  
所抑者亦連名薦之前後所上辭疏朝廷每優詔慰答  
至停祿以俟命僅予告歸既其沒也特贈為禮部尚書  
謚文肅遣官諭祭令有司治塋事始終極備皆平生意



望之所不及信公道之在天下固亦不可泯者公孤介寡合性氣屹屹嗜義如渴見不善若將浼然家居孝友自違養後輒無意仕進少從從父寶慶知府世脩學師事終身及玉城山人世懋早卒並集其詩刻之其父贈禮部侍郎世衍嘗出祭田二十畝公買田代之而以其田分諸弟及供家塾間以塋族之貧者又買田以益弟姪數亦如之又修宗譜構墓廬為合族計其高祖孝子溫良遺行久弗白至公始表著之祖母趙氏以節死後

公以侍郎考績請輟所得封誥移為旌典詔持表為貞  
節之門仍予誥命以至鄉郡諸先正遺文善行皆輯錄  
以傳與南京工部侍郎黃公世顯為知己始終不負嫻  
黨知識困乏者皆有周卹然實無長物惟節俸入為之  
其居常第疏食醴飲而已為詩精鍊不苟力追古作當  
所得意殆忘寢食又尚理致謹體裁考訂評隲多前人  
所未及所著有桃溪籍續真西山讀書記伊洛淵源續  
錄伊洛遺音并四子擇言元史本末宰輔沿革國朝名

臣事略尊鄉略赤城新志及詩集論諫錄螳忱稿汲綆  
餘誠歸夷雜錄總山集祭禮儀注若干卷謝氏出晉康  
樂公後經畧使鞅至今若干世公配陳氏繼孔氏宣聖  
五十七代孫皆贈淑人公三子某某次興寅孫一必祚  
公生某卒某壽七十六必祚以書告哀曰非先生文吾  
祖且弗瞑嗚呼公天下士也予故先序其出處之大者  
後及其詳而系以銘銘曰

君文獻地山水盤結鍾靈聚英代產人傑謝出申封從

晉東轍我我東山支編諸越嶢嶢方巖逮宋乃發石生  
其間百碎無屈維文肅公矯矯風節言論鏗聳行操孤  
潔文必已任教必身率羣疑衆咻莫我能述事有難繼  
弗我遑卹力有餘步寧我無蹶其所未竟付諸造物好  
德考終生也無缺鄉賢有錄公自編帙信史有筆公所  
刪述公名孔彰允繼前哲

明故光祿大夫太子太保禮部尚書致仕贈特  
進右柱國太保謚文端周公神道碑銘

昔在英宗復辟之日登明選公儲養俊哲以敷遺于後  
時太原周公實領國史越三朝四十餘年存歷諸曹官  
至一品再謝政事以功名終君子謂其遭際之盛出處  
之善胥得之矣公諱經字伯常公舉天順乙卯鄉貢庚  
辰進士入翰林為庶吉士壬午授檢討成化丁亥修英  
宗實錄成進編修己丑同考禮部會試丙申直講經筵  
秩滿進侍讀丁酉考南京鄉試戊戌改春坊右中允日  
侍皇太子講讀辛丑莊懿公致仕居南京公乞往省命

給驛賜道里費且速其來講御製文華大訓皇太子每  
起立拱聽內閣大臣或以為勞謂公宜跪請坐聽公不  
從竟得如禮甲辰丁莊懿公憂服闋弗調或諷使圖進  
取計公峻卻之孝宗登極超擢太常寺少卿兼侍讀弘  
治戊申命直日講修憲宗實錄未成己酉擢禮部左侍  
郎兼議政蒞事必傳經義若卻西域貢獅毀黃村尼寺  
為先朝盛德事皆公與左侍郎倪文毅公贊成之辛亥  
改吏部遷左侍郎一日有中官諭旨欲以通政司經歷

高祿為叅議公獨承諭執不可退與尚書王端毅公上  
疏論之靈壽人獻大明川民田于太監李廣戶部駁議  
弗得公謂諸司宜會奏尚書耿文恪公屬公具草上之  
事遂已乙卯諸司以災異言事吏部請早視朝勤聽政  
節侈費省遊素止貢獻而斥樂戲一事尤急亦出公手  
後有蹤跡為此草者以問耿公公曰宜以實對耿曰吾  
為尚書不宜他諉時論蓋兩賢之丙辰拜戶部尚書諸  
王府多奏欲自領河泊所賜稅罷其官公言國體非便

且民力不能堪乃止有中官織幣南京奏給長蘆鹽八千引鬻于兩淮仍給淮鹽價銀二萬兩公言鹽筭本以濟邊且各有分地若公許越境則私販必多官鹽反滯命止長蘆之鹽勿給浙江守臣亦請給竹木銀鈔稅為織費公又言關征非舊且浙地大水民困徵役先暫停織造從之每委官鹽稅必諭以愛節民力課入多者則與下考大同缺馬尚書馬端肅公請給折糧銀就市之且戒警糧官毋得沮格既傳旨公言糧馬各有職不宜



侵奪且引祖訓六部不許相壓之文為據詞甚激上為  
改命兵部以馬價銀充用給事中魯昂以財用匱乏請  
令諸藩公帑積貯及均徭羨銀盡輸大倉公言用不足  
者蓋以織造賞賚齋醮土木之故若一切節省自宜少  
裕必能盡括天下之財恐非藏富于民之意又有旨取  
大倉銀三萬兩為張燈具公言不可以小民膏脂供耳  
目之玩乃一命以明年內帑藏額補還之內靈臺奏增  
灑掃卒宜當給月廩公言禁地非外人所得入不過為

守者私役耳疏再上竟寢之清寧宮災方議脩建兵部  
欲調山東民夫七千餘人公曰今歲歉民貧不可使遠  
去鄉井也請以本都羨銀就京師雇役為之外戚張氏  
有河間賜地數百頃欲并其旁近民田千餘頃得之且  
乞畝加稅銀二分公言河間多沮洳比因久旱貧民即  
退灘地耕之遇潦輒沒即畝加稅將貽無窮之害且王  
府賜田例畝稅二分而此獨加稅人將謂朝廷待外戚  
與宗親異矣又聞憲宗妃家亦有私田與民田比一切

奪之彼亦無以為業人又將謂朝廷待張氏與他外戚異矣疏三四上後又以雄縣地獻為東宮莊者上因公奏皆抵之罪一時近戚貴幸有所陳請公一裁以法皆斂不得妄肆有中官及部屬以言事獲罪與同官上疏抹之聲稱藉甚而怨謗亦日深庚申以灾異事乞休致詔許之加太子太保賜勅給驛令有司月給米三石歲給輿隸四人命下廷臣皆相顧失色爭上疏留之不得自是數年中外請留及復起者多至八十餘疏前此未

之有也公歸摘勅詞二字為保完堂嘯傲其間今天子  
嗣位特起為南京戶部尚書公辭以疾會丁繼母憂未  
上戊辰服闋改禮部又辭上降勅遣使即其家起之至  
京疾作寓都城外上遣人慰問賜玉帶及通鑑纂要以  
示寵異比蒞事數月疾復作累疏乞休乃許之復賜勅  
褒諭推封三代月廩輿隸視昔有加焉至明年公以疾  
卒上震悼輟視朝一日贈特進光祿大夫右柱國大保  
謚文端命工部治塋事禮部諭祭者九公年七十有一

以是年某月日寔于彭村之原配韓氏陝西按察司副使仕琦之女慧而知學先公五年卒已賜塋至是而合子四人長孟以蔭為右軍都督府都事次曾舉進士累官尚寶司少卿皆有世守次齊早卒公鄉試時有甘露降于學縣之松學者因稱為松露先生公亦以自號少穎敏而莊重寡言笑繼母性嚴急奉事惟謹及遇諸弟友愛曲至母弟綸早卒撫其四孤皆登仕藉少時受學于吳布政繹思吳既謝事歲致衣一襲銀十兩終其身

其友蔡知府霖卒申御史論罷官皆貧甚並致優恤久  
不厭其敦尚義氣類如此為詩文及書麗而有則自為  
小官已忘世用日侍莊懿公習聞天下事矢志清散兩  
薦為內閣不果入其為尚書簡在屬吏親為裁決剴煩  
應變畧無稽滯而秉政執法不為權勢所撓尤人所甚  
難者予與公同官久比以孟曾請銘神道因撮其行業  
之大而于戶部獨詳焉墓銘出少傅新都楊公者尤備  
可互見也銘曰

國有世臣實稱濟美其最貴者尚書父子施何耿王維  
白及倪公蓋其一他莫與齊麥有兩岐芝有三秀矧人  
有生得物之厚惟家之昌惟國之光氣運攸繫亦靡厥  
常兩都四曹公際其盛令終令歸公受其正父曰莊懿  
子曰文端代有美謚夫人則難亦有難者祖孫科第公  
居其間有創有繼一品雖榮公不為華七十誠希公不  
為遐胡進之難而退斯易所不朽者非世祿謂大行之  
西有生若人百世而下其永有聞

明故贈奉直大夫尚寶司少卿崔君墓碑銘

吾甥崔尚寶傑泣告予曰傑早失怙恃銘弗備禮惟先  
考平生苦志篤行矻矻勤子教而弗觀厥成茲竊與錫  
命按制得樹碑墓道非我外舅誰可為不朽託者乃自  
述事狀縷縷數千言予覽而哀之按崔氏本蘇州吳縣  
人君父諱仲祥永樂間自永平盧龍衛改籍錦衣隸內  
監工作生二子君其次也諱忠字景忠十餘載能楷書  
內監掌書記者竒之以告其長遂勒令供事值正統乙



已事尤劇小大悉辦監官出使者必挈以從咸化癸巳  
以勞授工部文思院副使乙巳遷大使君素抱智識久  
益精鍊凡工徒錢穀動以數百心計手籍不遺銖寸尤  
習文移體式嘗使山西前威寧伯王公見其奏曰此老  
吏筆也又嘗過河南建王府佐監官出納所省半常數  
比歸官吏部諸君多致贐悉孫辭之一時中外共事者  
多藉以起家君獨畏法痛自檢制人以急來赴則曲為  
調護亦不受報大監黃公順老更事殊愛君如左右手

比卒哭為失聲哀銀米為賻復念之不置書其名于公署曰俾後來知有此人蓋君雖窮約不顯施其所自試亦畧畧可見已君性雅潔食不兼味服止布帛一韡至十年祭必致肫遇姍戚必從厚乞其門者不使空返事外祖父母至分俸為養內弟有負券輒棄之其人至齋愧以沒而君弗計也顧不苟合族子有自殘者絕不使見族女將為尼即勒歸嫁之嘗手錄舉業數百篇遺傑謂之曰吾本慕學為人所抑弗克竟吾志是惟汝責傑

謹識之不敢忘配宜人許氏常之武進人家隸尺籍生于京師厥考重擇配二十七而始家事姑謹姑亡君在外或閱四三年宜人獨撫子女雖歲時未始歸省謂傑曰我初歸汝父家甚乏後漸饒裕今益落中間不過十數年好光景猶如白駒過隙耳汝勉圖之吾不及見矣因指其女曰汝知汝父之所以囑汝者乎傑亦謹識之不敢忘君卒以弘治某年日年五十七宜人卒以壬子某日後君三年合塋于城南西郊亭之原傑舉乙丑進

士初授禮部主客主事以才行聞調兵部職方三載考最時已署儀制員外部例得贈君為兵部主事階承德郎比歷郎中遷尚寶少卿復以考最贈君階奉直大夫宜人自安人實再命焉君二子長俊早卒女適周寬其嫁也傑實成之傑以父命娶于彭而卒吾子兆先請以吾女繼之初封安人今加封為宜人君四孫某某幼子良吾女出也銘曰

往役之義不為屈身身所得為與仕者均生未從學暗

合道軌豈弗終仕亦既教子易簣有言授簡有辭九原  
可生還以報之報之維何既載科籍錄有家狀命有封  
錫矧有大者有行有名行則不辱名則孔揚我弗知君  
亦惟子故後二十年刻石君墓

封翰林院編修文林郎王君墓碣銘

弘治戊午天子覃恩臣下永嘉王君祚以其子翰林院  
編修瓚貴獲給勅封如其官階文林郎又明年君壽終  
館閣諸學士而下以瓚故遙致祭賻用大夫之禮周編

修朝振以鄰郡產狀君行瓚奉以請銘碣于墓道亦禮  
所得備云君諱祚字怡遠生而醇謹朴直簡言慎行事  
親能左右永順出入扶掖比老尤力奉諸兄情理兼致  
旁逮族黨務相為輯睦常以孝弟聞于鄉善交際言若  
恐傷人有犯者直受之畧弗與校或忿爭不相下求直  
于君君有言輒帖服以去郡邑廉其賢曰是可屬公家  
事藉為耆老事有難理必委之無弗辨者年既高則禮  
致鄉飲置諸賓位蓋自壯至老未始有仕進意惟教子

讀書服田畝曰士四民之首其次莫如農外此者吾弗  
知也及瓚進士及第擢官侍從又遺書戒以積學勵行  
故瓚美文翰以恪慎稱于官焉君既屏家務放懷自適歲  
藝秫釀酒雜種柑橘茭蔗以給燕飲植梅名軒以供吟  
詠時選勝地挈榼攜客鼓琴奕碁為樂或登近海樓閣  
觀潮望月累日夜弗厭若不與世故相涉其寵錫壽祉  
雖理有自致實未嘗預卜也君生某卒某王氏本溫著  
姓曾祖壽大在元為福建提舉每雪後視里有不舉火

者輒周之祖元弘為千夫長入國朝初定田賦嘗請減鄉稅鄉人德之考文煥號環庵居士前知府何公文淵著牧民備用嘗稱其名君之賢固亦有自哉銘曰

維溫有田一歲三獲彼地之沃伊人之力藉令再易當倍其息維人亦然在理無忒王實著姓代有陰德若培盆深若稼將穡斂數世之積于子是責終食其報祿養封錫君弗自耀曰先人之澤我銘在碣來者必式

懷麓堂集卷八十一



欽定四庫全書

懷麓堂集卷八十二

明 李東陽 撰

文後稿二十二

誌銘

明故嘉議大夫詹事府詹事兼翰林院侍讀學士贈禮部右侍郎陸公墓誌銘

弘治乙卯三月八日詹事陸公卒朝廷賜葬祭如制長

子含章來自家復援前比以請特贈禮部右侍郎含章  
乃奉程公所著狀乞予銘墓蓋予與公同史局同講事  
又並命考禮部會試契分殊厚三十餘年於茲矣嗚呼  
孰謂遽銘公之墓哉公少有盛名成化乙酉以府學生  
舉南畿鄉試第一連擢禮部高第廷試第三授翰林編  
修英廟實錄未成引疾歸肆力問學其父郎中公得謝  
南曹公乃北上分勘通鑑綱目暇則應制賦詩數蒙賜  
楮錙會修宋元史續綱目分領元史丁酉書成賜金幣九

載滿則遷侍講再閱月仍以修史功陞右春坊左諭德  
今上在春宮侍講讀庚子主考京闈鄉試癸卯丁郎中  
公憂讀禮既益大肆於學未輒出弘治戊申今上詔修  
憲廟實錄公被徵至則以侍從舊勞陞右庶子兼侍讀  
充經筵講官尋奉命日直便殿講讀辛亥實錄成陞詹  
事府少詹事兼侍講學士復兼領玉牒事癸丑主考會  
試甲寅以日講勞特陞詹事兼侍讀學士僅閱月而病  
閱歲而卒年五十有四而已公姿貌秀偉識趣超詣見者

謂當遠到公亦重自待必欲大有施於時埋光剗彩不自淺露而鋒穎隱出若莫能制其所受職纂述精確論說明暢校閱詳慎舉無遺力退而為文縝密峻潔力追古作而不輕應接有求之積歲卒不可得者然所著已累百數十卷蓋其發情感物之作為多志尚修潔晚益剗礪喜談節義嘗念宋刺史姚等十八人死難言於有司立忠義祠祀之君子謂公於是有遠識焉公諱簡字庶伯一字敬行號治齋又號龍舉子考諱愷舉進士累

官南京戶部郎中妣徐氏繼母蕭氏俱封宜人祖諱淵  
南樂縣學教諭贈南京戶部郎中妣李氏封太宜人曾  
祖朝宗以父命後表叔金彥名氏遂仍其姓公既仕乃  
復陸姓世居常之武進徙自浙蓋宣公裔也公父從教  
諭公居奉化實生公自公父及叔父怡愉先後舉進士  
為郎署至公並顯公娶同邑池氏先公卒繼鳳陽姚氏  
封宜人子八人某某女四人適某某含章奉公及姚宜  
人樞卞是年某月某日合葬於某山之原程公所著為

狀者也銘曰

文以奇勝恥弗已出持堅敵強孰我能屈中所自負觸  
事硯發有銛弗施飲志而沒若在治金久乃成質器之  
實堅恒百斯一成斯棄斯嗟彼造物謂天墨墨孰爾揚  
揚公名在人公沒不滅

明故資德大夫正治上卿太子少保南京兵部  
尚書謚莊懿張公墓誌銘

公諱鑒字廷器姓張氏累官至太子少保南京兵部尚

書階至資德大夫正直上卿封至祖考妣廕至其子卒  
謚莊懿遣官諭祭賜葬於華亭車墩之原公在正統末  
舉進士景泰間初命為監察御史方其北戎內寇承敕  
往北畿河南山東西清理馬政密雲謠言有不軌者公  
受密命往察且撫定之按宣府大同有都御史子犯法公  
案其罪並劾其父罷之以宣府將佐多冗請分置獨石  
諸邊歸總諸道奏牘事繼承勅巡臨清案治豪猾餘黨  
悉散天順間再命為江西按察司副使風裁清肅吏不

敢欺三命為按察使有贛州賊作亂公預捕獲功賜白金綵幣四命為陝西左布政使督運遼餉用不告乏五命為都察院右副都御史巡撫寧夏城皆土築始甃以甌導河流以溉屯田若干頃嘗帥兵行邊與賊戰歸所擄男婦及牛羊器械賜敕褒諭戎四叛王師出固原公劾守將致變者寘之法時寧夏屬地多永樂所置降兵朝廷慮其為變公受密勅撫之如密雲間遭父喪起復巡撫河間諸府值久旱給民牛種俾不廢業復承勅考



稽戎籍王師出宣府催督軍餉如陝西巡撫大同斬首  
寇奪兵械築城浚壕清理屯種復被褒諭如寧夏六命  
為刑部右侍郎七命為左侍郎江西有大獄連引千餘  
人公奉命會官往勘皆得實八命為尚書法意平恕侍  
經筵讀進士卷賜酒饌楮錫會朝廷遣內臣錄囚公與  
之察情可矜疑者奏釋若干人復賜楮錫加以羊酒九  
命加太子少保以母喪去服闋今天子御極即其家起  
之改南京兵部叅贊軍務秩如故公以國家根本重地

政尚簡靖兵民悅服蓋自筮仕以來歷三朝四十有六年更十有一命年七十有二而卒其始所樹立所施措舉克自遂而終以厚重持之不弛不折老而不變可謂難矣公長髯偉幹襟量夷坦與人謙讓不事矯飾不以富貴加人人以是稱之公卒於弘治某年月日乙卯某日乃寔公先世本揚州人從宋南渡居華亭祖原壁父瑀鄉貢士累官淮府紀善俱贈資政大夫太子少保刑部尚書祖母岳氏母吳氏俱贈夫人配衛氏累封夫人

子二長景國子生次某女一適某孫二女孫二景奉南  
京兵部郎中孫君行狀來請銘乃叙而銘之銘曰

舊都在南帝屬羣輔公為尚書實贊留務世際重熙武  
偃弗服本兵壯強城府肅肅公在北陲摧堅折衝公在  
西曹詰姦制兇斂厥鋒銛歸於大體內寧外清循治之  
軌垂紳正笏越五六年華不外褻實則茂焉國有大臣  
先朝是遺胡天弗卹遽爾長逝九峯之原實維帝畿山  
遠水迎以綏公卿穹碑我我過必下馬我銘其幽以俟

來者

明故都察院右副都御史唐公墓誌銘

公姓唐氏諱瑜字廷美其先晉陽人在宋有曰子方者  
為御史中丞高祖諱英國朝洪武初為上海稅課局大  
使始居松江大父諱以忠弗仕父諱昭累封中議大夫  
贊治尹衢州府知府母張氏繼母沈氏皆封恭人公器  
宇凝重失恃時纔九歲事繼母如所自出十五遊邑庠  
以尚書舉正統丁卯鄉試登景泰辛未進士第拜南京

禮科給事中趙都督者有罪公劾寘於法甲戌京師饑  
分地給食活者甚衆天順丁丑以繼母喪歸辛巳擢知  
衢州府詢察利病惟民所便其俗健訟示以廉明民無  
敢欺者縣有孔氏別族為民所奪以私財贖其祖使供  
祀事其子孫德公圖像於家廟並享之石塘洪浮橋壞  
為舟以利病涉癸未年疫為文禱於神雨大作沴氣遂  
消甲申洎成化丁亥數值旱禱雨輒應民勒石紀其事  
有李延者為媒匿人聘金粥二子以償不足又市其妻

公聞而歎曰民窮而犯法畏法而棄妻子典守之過也  
贖歸之龍游張福戕吳氏四人事覺以誣金氏已誣服  
公疑其枉別置於獄以甘言誘之又始得實乃釋金而  
罪張民相驚稱之曰神有為士者賦十詩頌之將去有  
千人詣朝乞留不得老稚攀送至不能行後民立生祠  
及去思碑於府學辛卯進湖廣左叅政分按荆襄置廩  
積穀值歉發若干斛鈎房流民當散歸者公給餼解繫  
俱獲生還甲午荆湖水溢民四出逃溺公發舟載鹽米

給之襄河為患作隄障之民名其堤曰唐公堤京山舊  
無城公始議修築土亦賦十詩如衢州乙未擢山西布  
政使取道省遂居父喪丁酉改雲南右布政使尋復遷  
左布政使奏立祠祀王忠文公名禕正土官宗派以定  
傳襲憫邊兵貧米價貴則給以米賤則易以銀時悉告  
便蒲蠻弗靖親為榜諭皆聽命辛丑以大臣薦巡撫湖  
廣壬寅薦河南癸卯薦貴州甲辰薦本藩乙巳薦兵部  
左侍郎皆弗果為御史所誣封及再世丙午遷都察院

右副都御史巡撫甘肅訓練調度若素習兵事者以其俗輕生特嚴法制出戰者卹其家死事者請賜以祭奉命與御史錄囚多所平反詔使至諷織細毳充貢獻費至數倍公執不從復有武臣被黜者競為陰中遂坐劾以去時論惜之弘治壬子以建儲君詔復故官致仕甲寅某日疾革奄然而逝壽七十二配尹氏封恭人先卒子六某某女五俱適名族孫十二乙卯某月某日葬公於周涇之陽公生而秀偉喜怒不色見事親終慕待羣



從子弟有恩尤善吟咏所著有學吟稿拙菴集滇南雜稿若干卷藏於家公在雲南陳脩邊五事在甘肅陳時政兵脩各五事及凡所請事宜前後五十餘卷多見施行論治者皆稱之銘曰

仕有失得詎不謂命有失若得亦詎非正世豈無得匪求則競厥終孰多公有遺慶慶不在大公族斯盛盍觀厥成以俟天定

封孺人柴母蘇氏墓誌銘

都給事中柴君昇衰經而拜吾庭其色墨以悲察其意  
若有所欲言叩之曰昇不幸有母孺人之喪將歸葬惟  
禮制弗合是懼又懼潛德之弗白為人子羞故奉狀請  
銘諸給事君感其孝皆為助請其狀則左給事李光昭  
所著也予每見柴君論事抗慨激發氣勃勃不可屈及  
幽居執禮恂恂若不自容亦為之感之曰有美在人而  
吾弗克成之人情乎乃為叙及銘孺人姓蘇氏世居濟  
南商河處士某之女歸於柴氏為封給事中廷美公之

配柴益南陽內鄉望族去商河千數百里公叔父斯馥  
嘗為驛丞于德州公考景州判斯馨實遣公從時公方  
弱冠驛丞為擇娶商河與德比境聞孺人之賢始禮聘  
焉叔母譚氏御下甚厲獨于孺人婦親而女育之公歸  
內鄉景州公尚家食暨太孺人賀氏喜曰吾弟能于吾  
子得吾婦使吾自擇無以越此矣賀暴疾孺人衣不解  
帶夜則禱于神祈以身代景州之仕也公挈孺人以從  
未幾景州卒孺人奉賀歸養愈篤然亦念叔氏恩不敢

忘會驛丞謝事譚病瘍危甚孺人事禱如賀病時連遭  
兩舅姑喪塋祭皆如禮公有異母弟文玘方六齡女弟  
加初皆孺人撫育公母兄丈夫婦早卒遺孤一文玘夫  
婦遺一子兩女又撫之俾有家室自餘家務非公命不  
敢行而綜理詳密恒助所弗暇內教尤肅子昇雖甚愛  
督令就學小有失必訶責之不少貸隣姥或諫之曰吾  
不欲使驕縱他日類鄉里兒也昇舉進士拜工科給事  
中進都給事中考最被勅命封公及孺人孺人生于正

統某卒某年六十是歲某月某日塋于某山之原銘曰  
有子如此必有母也雖父教則然必有輔也才斯成斯  
固其所也曷其報之名以遺爾後也

明故資善大夫南京戶部尚書致仕贈太子少  
保潘公墓誌銘

嘗觀蒙翁岳先生遺文稱潘公之賢且謂公在吏科一  
官二十年為巧宦者所譏笑其守不變予用是慕公比  
入朝籍未幾而公為南京太常以去厥後數歷出入又

二十餘年以尚書致仕歸又九年以壽終跡其履歷無  
媿乎所謂大臣者予於是益服公之知人公子儉奉翰  
林江侍讀文瀾狀來請銘是固宜銘按狀公姓潘氏諱  
榮尊用其字也先世出河南固始唐季從王氏入閩有  
為龍溪簿者始居漳歷宋元入國朝族益蕃碩祖某  
祖妣某皆用公貴公起于縣學生正統甲子舉鄉貢  
戊辰登進士第被簡為吏科給事中景泰壬申遷右  
給事中甲戌歸省遂丁外艱天順甲申進都給事中

復以內艱去成化庚寅擢南京太常寺少卿丙申進南  
京戶部侍郎右戊戌奉勅督南京儲糧尋改都察院右  
副都御史仍領其事辛丑以左侍郎召入會尚書缺權  
署部事甲辰陞南京戶部尚書丁未今上登極公上疏  
乞休致其為少卿再乞休不許至是上以其詞意懇甚  
許給驛歸仍月給米二石歲給輿隸四人終其身其卒  
以弘治某某壽七十有八矣訃聞贈太子少保遣官諭  
祭命有司營葬事丁巳某月某日窆于某山之原公丰

儀偉特性寬厚不屑屑為苛細居家孝友與人交底裏  
洞見而在公謹慎其為進士擢師廣東出納明允為給  
事中論停起復抑奔競數事時論韙之克荆蜀二府冊  
封副使又克琉球國冊封使慎不辱命為少卿薦享儀  
物必致精潔為都御史禁倉庾諸弊省軍士般剝諸費積  
羨米數萬斛以脩賑濟為侍郎疏抑權幸之撓法者減  
兩浙償補鹽課人皆稱便時漕河淤滯承命往督漕  
舟無後期者為尚書政尚寬簡惟卹下養民是念其



于營利澹然無所戀著卒克辭官謗免時毀以保其身  
云公配林氏累封淑人贈夫人先公卒側室溫氏生子  
四某女二孫九公卒之八日溫氏哀頓成疾死焉故附  
書之銘曰

士仕而出譬行路然有之必歸實鮮厥全居易由正庶  
幾罔愆不我失義命也則天明哲保終于公有焉公際  
宦途弗驟以顛身計以十歲計則千階陟二品三朝載  
遷崇名顯資不愧為賢思危去盈未倦輒還某水某山

我廬我田有子及孫以娛目前壽考終命式歸九泉是  
曰大歸匪歲與年載啟手足永辭冰淵有穴孔深有築  
孔堅公靈在茲世守弗諼

明故昭勇將軍錦衣衛指揮使劉公墓誌銘

憲宗初設武舉命兵部及諸總戎校天下應試者若干  
人彥方劉公騎步射及所答策皆中格遂得首選迄今  
二十餘年中格者散布中外多不甚顯而公官至錦衛  
指揮使壽終于家若科舉之法所謂拔十得五以彼校

此其難尤甚如公者今亦已矣惜哉公諱良彥方其字永平盧龍人祖諱某從文皇靖難白溝之戰以功授永平衛百戶考諱斌嗣以討賊功遷武城後衛副千戶正統乙巳寇犯京師公以胄子守德勝門以功授總旗景泰乙亥徙都督白公玉征湖廣五關諸蠻功最多擢百戶天順辛巳曹賊亂名亦在功籍進副千戶成化丙戌為太監王公定所薦從征廣西征雞冠諸山苗寇遷正千戶庚寅始與武舉擢署指揮同知月加俸三石令分

領奮武營數隊總戎薦其端謹達事可任將帥久之未  
用也然論武事者必稱焉丁酉錦衣衛官缺兵部簡于  
衆以公名上命署衛事日親任每郊祀必扈蹕或留直  
禁衛累賜飛魚蟒衣佩刀及通鑑綱目諸書己亥勅督  
都城渠道修金水河賜金帛文綺諸物壬寅與法司勘  
獄江西歸亦有羊酒之賜益自筮仕至是守不變名益  
日起遂直授指揮僉事仍署同知乙巳勅督捕京城內  
外盜賊弘治戊申今上錄捕盜功直授同知辛亥賜誥

命贈祖及父如其官祖妣及妣皆淑人丙辰復累捕盜  
功特陞指揮使未幾卒上遣禮部臣諭祭于家公器宇  
魁碩言論鴻暢涉書史及鞫畧事親孝謹父沒弟儉  
嗣世官悉以產業讓之所交皆一時英俊意欲立功萬  
里外中不獲所願殊不樂既能自拔起名譽致位通  
顯才望兼積然亦老而且病矣識者猶以為未盡其用  
云公生某卒某年七十二娶王氏贈淑人繼魏氏封淑  
人子四某女三適某卜以日塋公城東西洋壩之原奉

吾友工部左侍郎曾公克明狀來請銘予乃據狀以銘之曰

今之錦衣右金吾身先導駕夾陛隅公長六尺美且都在帝左右承宣呼顧盼光出重瞳餘出領璽勅司邦涂外掃四野空庭颺公歸退食華堂居高談大嘯緩步趨問公能武還能儒聖朝武偃無外虞公惜不得當勾奴年踰七十壯者如公懷有物鬱不舒斂而歸之返厥初都城東原平且腴刻名著績吾豈誣後欲知公此其符

明故中憲大夫雲南按察司副使致仕石公墓

誌銘

嗚呼公吾同年進士也以按察副使卒于家吾聞而悲之其子監察御史玠翰林檢討瑤皆歸襄事奉白侍讀秉德狀請予銘按狀公姓石氏諱玉字大器世居真定之藁城曾祖諱永祖諱友智考諱麟山西臨晉教諭贈監察御史嘗署縣事坐累謫廣東英德為河泊使卒于官遺腹生公母徐孺人携以歸勤苦鞠育誓不二志後

被旌為節婦公痛不逮父取遺書讀之始習禮補縣學  
生改學易御史賞其文名遂益一郡天順己卯舉京闈  
鄉貢甲申登進士第成化丙戌被簡為御史監通州倉  
摘抉姦蠹聲驟起辛卯出按江西九江李指揮者誣執  
十七人為盜送巡江御史獄既上公憐其非盜自往趣  
對即日解其桎縱之監鄉試事綜制嚴密簾內外無敢  
言私者癸巳擢山西按察僉事戊戌遷副使丙午進按  
察使前後十五年所決疑獄無慮百數事涉利害不巧



為避忌其在大同值西北用兵躬督餽餉未嘗告乏咸  
寧海之捷以勞賜玉幣若干平陽飢民死徙過半刑部  
侍郎何公喬新奉勅往賑公承檄分治徧歷州縣衝冒  
疫病病且憊或請暫歸大原不可小愈輒力疾從事所  
活甚衆杜侍郎銘邊都憲鏞陳御史英亟薦于朝久始  
進秩當道有弗悅者仍以副使徙雲南平陽人遮拜道  
旁曰是活我者皆攀泣不忍釋公慰諭而去至則以公  
務上京師遂歸藁城未幾遂謝事時玠瑤已舉進士後

玠歷知縣瑤為庶吉士至今官人謂公抱藝負氣卒闕其所施以沒而二子以才雋顯于時公亦可以無憾哉公性質直意氣磷兀不能下物雖居官久家無贏貲亦以儉自律不少變睦處宗族若從弟石州同知斌從子吏部主事確皆經指授教子尤嚴恒曰吾以孤遺自底成立持憲二十年未始壞法汝輩生長溫飽繼有官祿若所就如吾非志士也此其行與教可知已公生某卒某年六十有三某月日葬宜安社徐村之原配趙氏封

孺人以瑤恩進封恭人子五女三銘曰

有鸛摩空翼倦而止何斯人斯國之笏史中憲執法外  
臺振紀中更險夷誰尼誰使自我制命能進能止其進  
與止于我弗愧匪天則誣報以賢子報寧我責固物之  
理我所未竟庶其在此刻銘示後請究終始

封恭人黃氏墓誌銘

恭人黃氏河南右叅政王君德潤之繼配也德潤初娶  
于李氏為吏部尚書秉之女卒贈孺人繼娶于孔氏為

宣聖六十一代孫某之女未及封又卒恭人實再繼焉  
其始封以御史貴曰孺人再封以知府貴乃曰恭人知  
府秩在外非預旌異者不獲推恩恭人之封蓋特命也  
恭人實歸德衛指揮同知某之女年二十三歸王氏德  
潤方為御史于南京時已再悼亡內政久無主恭人恭  
順自將動止無違禮歲時家祀必躬事烹滌客至亦如  
之薪米出納及姻黨慶弔往返之節皆其手制德潤  
每在公恭人令僮僕謹愿者主關鑰朝晡饋食外門庭

聞然無敢私出入者及知湖州恭人以其地素饒富疑  
謗所集顧宅後有桑百株盡伐之曰毋興後日養蠶之  
念也蓋德潤以清儉守官業而恭人實佐成之李恭人  
有子四人曰崇儒崇仁崇文崇獻皆習儒業恭人每督  
之勤及病疾則曲為調節或掣去書卷不俾過勞曰身  
在乃可言學也又側室子三人曰崇讓崇有崇素恭人  
自有子一人曰崇儉女一人適榮選皆教之無間然焉  
德潤既陞叅政恭人問歸自河南子崇久已舉進士為

翰林庶吉士授戶部主事崇獻繼舉又繼為吉士崇儒亦舉鄉貢恭人皆及見之比崇儒罷試禮部德潤適以公務道其鄉而恭人遂以疾卒年僅四十鄉之人方寵榮之又悼其不壽以死相與為德潤弔崇文輩在京師將奔喪泣請于予曰吾兄弟生不幸蚤失恃母實煦濡羽翼之今幸獲升斗之祿圖有以報德而養己弗逮非得先生銘以永其傳其何以慰吾父之悲德潤及崇文在禮部皆予所舉士而崇文在翰林又奉詔受學于予

于其父子間知其悉嘉其世受文行又美其內則之懿  
銘安可辭恭人卒于弘治丙辰五月二十四日某月某  
日葬于某山之原與李孔皆同壙銘曰

葵可拔桑不可植彼夫之則此婦之德藥以助勤書以  
節神彼母之仁此繼母之恩為婦為母是謂無負終以  
貽爾後

明故奉天翊衛宣力武臣特進榮祿大夫柱國  
宣城伯贈宣城侯謚壯勇衛公墓誌銘

昔在英宗收攬天下才武之士自公侯伯逮于行陳兼收博采固有遺者正統之末遠邇雲集宣城衛公實在山東勤王茂樹勲績歷事累朝進封伯爵南北効用以老謝事壽考令終回視曩時諸傑挺然若後凋之松柏而今亦已矣茲不重可惜哉公諱頴字淙正世為松江華亭人祖諱炳當元季以鄉兵歸高皇帝從征伐長行隊考諱青代後授蘇州衛百戶從文皇帝靖難累官山東都指揮僉事平妖賊數百輩上謂其有古名將風



英宗即阼進左軍都督府都督僉事有子十一人公行  
居次母周氏夫人獨異公曰是當興吾家公兄頤已承  
嗣為濟南衛指揮使卒無子公竟代之蓋正統戊午也  
己未上京師太保成國公朱竒其貌選領山東漕兵又  
改領京營番上兵甲子朱公又試其騎射謀略薦之朝  
擢山東都司署教指揮僉事己巳之變應詔入衛尚書  
于公謙以公名薦實授僉事進都指揮同知武清侯石  
亨又薦之擢後軍都督府署都指揮事領右哨兵時廷

臣有異議者公從守議請募死士調諸番兵以壯根本  
是冬敵率大衆突入公帥兵邀擊于黃花鎮白羊口又  
分守西直門連戰累日又承勅副石亨總京營諸兵以  
功實授僉事敵既退進都督同知賜蟒衣玉帶又與都  
御史俞士悅稽兵籍收散卒遺械景泰壬申帥兵出駐  
宣府癸丑召還復督諸營兵天順丁丑英宗復辟進左  
都督掌前軍都督府事兼領禁衛日給酒饌賜寶刀  
白幣諸物與兵部會閱禁兵冬錄迎鑾功封奉天翊衛

宣力武臣特進榮祿大夫柱國宣城伯食祿千一百石賜  
誥券追封三代戊寅佩平羌將軍印鎮甘肅己卯抵河  
西敵大至議者謂不宜輕動公奮曰不力奪賊氣城何  
能守鼓行而前連十二戰破走之會廷臣議封爵有所  
釐正上以公方膺邊計特仍其舊辛己公破諸番于涼  
州都督毛忠在敵圍公冒矢石往救全師而還甲申西  
寧番拖沙作亂公帥衆深入擒斬俘獲共千七百餘人  
馬牛羊二萬有奇器械甚衆又請立儒學建廟置田教

人醫藥皆舊所未有者西人至今德之不衰憲宗即阼  
召公還成化乙酉命掌左府事調前府丙戌錄河西功  
加歲祿百石賜世襲伯爵佩征敵前將軍印鎮遼東能  
飭軍伍遠斥候常若敵至守邊數年無所失上降勅獎  
諭己丑公以疾請召還京第壬辰命視後府事尋命守  
備鳳陽丁酉調掌南京後府軍事協練京營兵兼令督  
習水戰連上疏請老辛丑復召還奉朝請後十有七年  
為弘治戊午正月二十八日卒於正寢年八十八矣上震

悼輟視朝一日賜棺槨一具米百石布百疋寶鏹萬緡  
命有司治葬遣官諭祭者十有三皇太子及親王皆祭  
如制仍贈宣城侯謚壯勇益優典云公廣顙豐頰聲  
欬如洪鐘且言論英發而意氣直遂更沉實有謀折  
節下士曲遵矩度老益更事歛不世用雖達官貴人不  
復延接坐享富貴以終天年然深居燕坐聞四方警報  
則抵掌扼腕若有馬伏波之志者蓋其性然也公先配  
嚴氏早逝封伯夫人又繼金氏生三子長璋當嗣官卜

月日塋于山之原茲復奉翰林編修顧士庶狀請予銘  
河西之捷我外舅蒙泉岳翁嘗製薄伐凱旋圖贊予  
因得而觀之壯公之功後又以外舅成國公莊簡故乃  
聯姻姬接公之言貌益信其賢不誣并據以銘銘曰

武功之爵五等斯極惟公父子再世而涉公起萬戶為  
萬人敵內衛京邑外捍羌敵摧堅破勁靡績弗成乃  
錫伯爵封于宣城旅矢彤弓皇有大賜金書鐵券國有  
明誓長自正統以及弘治八十八年壽考令終軫恤耆

舊上廩帝衷帑物有賻幽堂有封贈侯定諡以表公功  
維時熙平公戢弗出少當其勞老享其逸名我自取亦  
我能匿持所遺者以歸造物公子公孫守而勿失

明故通議大夫兵部左侍郎兼都察院左僉都  
御史贈兵部尚書李公墓誌銘

弘治丁巳宣府大同有警兵部侍郎李公承勅往經畧  
邊務歲垂盡公在宣府疾作戊午正月二日遂不起守  
臣給驛歸其喪上聞訃悼惜特贈尚書遣官諭祭戒有

司治墓事其子昆奉春坊中允張天祥狀請予銘墓予  
公隣比雅相善即弔于郊乃叙而銘之公諱介字守貞  
後改字守正萊之高密人祖諱遜陝西都指揮使經歷  
有善績考諱傑舉鄉貢累官至太倉衛學教授以學行  
聞皆贈兵部左侍郎公年十一能屬文從父之雎又居  
太倉聞見日博成化乙丑舉山東鄉貢教授君即解官  
歸曰吾有子矣己丑公舉進士改翰林庶吉士為文  
章雅健有法辛卯擢四川道監察御史癸巳丁外艱



服闋改河南道按兩浙鹽課舉利祛弊內有弗便者欲  
中之擢拾無所得還掌道事考覈詳實都御史以諸  
道奏牘委之每率諸寮論事或至觸忤不為變九載超  
擢大理右寺丞丁未遷右少卿今上登極代祀東岳諸  
神遷左少卿再遷都察院左僉都御史巡撫宣府練兵  
蓄粟為攻守計未幾召入佐院事清簡自律不事苛  
刻時稱得體辛亥扶母栗太淑人喪歸道所過州縣  
賻祭悉弗納服將闋會院佐員缺朝廷留以待公癸

丑復視事甲寅擢兵部右侍郎尋遷左侍郎日佐卿長  
籌畫兵政雖書簿填委從容判決未嘗廢事三載有北  
巡之命仍兼左僉都御史以行時已遣中官武臣練京  
營兵待報勦敵言者謂非文臣不可上即以督軍事付  
公公疾新愈亟上道至則敵已遁去公徧歷賊堡宣上  
威德倡勇策懦風裁卓卓稽鎮兵隱役者得萬二十人  
復募丁壯萬五千籍伍訓戰以俟征調聞大同屯租歲  
給牛具銀數十兩實不為官用而邊兵逋馬價方苦管

掠因奏請給之易置將領必詢衆議獨念大同有廢墻  
在境外請大修復以禦敵衝前後所上二十餘條寒夜  
呵筆手為皴裂猶草奏不輟事且竣未輟而卒公脩髯  
偉觀言動不苟養母孝事兄甚謹教諸弟尤力範簡皆  
舉于鄉禮際周至見貧乏者不吝賑給雖在官久沒之  
日家無贏財論者亦以驗公之賢云公生正統乙丑某  
月某日年五十四配杜氏洧川主簿鑑之女封孺人先  
公五年卒贈淑人莖縣西陸家莊之原是歲某月某日

公杜淑人祔焉公惟昆一子繼舉進士歷刑禮二部主  
事有父風孫二李自宋居高密十二世矣有為西臺御  
史者譜失其名里人指其世墓猶稱西臺李氏今公亦  
以御史顯殆古所謂復始者歟銘曰

惟時生才惟國攸重文武兼任南北並用或以辭藝或  
以才勇公生青齊世本儒業蚤遊吳會氣攬靈傑公在  
翰苑翹舒秀發公在臺寺秉國之法為右中丞彈壓姦  
黠為少司馬贊揚征伐帝命北巡公在邊徼握機制動其

令不擾內修外脩克壯天討奚必折衝乃見奇效弗試  
之藝有辭曷擣弗授之政有才曷施匪公則賢孰有孰  
宜天實用之而止于斯帝念舊臣優恤有制贈官正卿  
實表勤事公藏在地公神不死刻石紀功國有太史

亡弟東溟墳誌銘

嗚呼吾弟乃遽至此極也吾同父兄弟四人東山東川  
出先母劉淑人今弟東溟乃今母麻太淑人出也劉母  
早棄養山川次弟俱夭及吾父見背時吾弟尚幼今其

年纔四十而已而遽死也哀哉吾弟生秀而敏吾父教以書法輒能領解予教以舉子業有端緒矣屬病羸乏因念二仲皆劬書致疾遂不力就又不欲使與齊民齒乃隨例輸粟獲賜冠服為義官旋復謝去應選入四夷館習書譯庶幾得一命以為太淑人歡忽大病幾殆遂喪明越六七年以酒得疾百方療之竟不起嗚呼痛哉自吾弟之業屢易而弗卒吾不能彊而教之知其孱故也既苦病廢飲食居起惟意是適而吾弟能戒

知其託焉以自放也卧不言病病不言死知其懼吾傷  
也不以子女屬吾知其不待吾屬也嗚呼尚忍言之尚  
忍言之吾既失怙又失二仲今行且老矣而吾弟又舍  
我以去吾何為其情耶吾弟娶吾劉母之黨為孔氏生  
二子兆延兆蕃皆幼女三人其一殤也吾弟喪之一月  
吾率吾子兆先祖于小西門祔于吾父之墓之右墓之  
後吾弟實執菴揅以從比吾父加贈為禮部侍郎告墓  
之禮吾弟亦扶疾往赴悲感伏地仆而復興者屢矣嗚

呼寧知其遽相從于此也痛哉然是墓也去舊塋三里而遠二仲不得從吾弟死而塋于此亦可以少慰矣吾弟字容之生天順己卯三月十六日其死以弘治戊午四月十四日五月六日乃塋哭而識之銘銘曰

墓有父汝不孤矣家有母養在吾矣有兄在堂無懷爾雛矣

懷麓堂集卷八十二